

MGA ATABAY NGA LIKIAN



Lord, I believe; Lord, I believe,
All things are possible; Lord, I believe.

² Magapabilin kita sa pagtindog sa makadiyut ug iduko ang atong mga ulo. Ginoong Jesus, nagapaninguha kami sa among mapaubsanong paagi, nga maipahayag Kanimo, pinaagi sa pagawit niini, nga kami nagatoo. Ug nagaampo kami, Ginoong, nga karon, magapadayon Ikaw sa pagpikaspikas ning Tinapay sa Kinabuhi alang kanamo, sa paghatag kanamo nianang among gikinahanglan, gikan sa Imong Pulong. Kay amo kining ginapangayo sa Ngalan ni Jesus. Amen.

³ Makalingkod na mo. Nakasiguro gayud ako, kung angay nato, kung akong isulti karon ang makapatagbaw gayud nga pulong nga “amen,” nga ang halangdong mga panalangin sa Dios sa gihapon magapadayon nga magpabilin diha niining mga nanambong.

⁴ Naglingkod ako karong buntaga ug naminaw gayud sa panerbisyo, nalipay sa maong mga testimonyo, sa nagkalainlaining mga pamaagi nga aduna sa kada usa diha sa pagpahayag sa ilang mga kaugalingon. Ug nga madungog ang mga bag-ong nakabig, ang igsoong Baptist dinhi nga niabot aron mangayo og pasaylo sa paghunahuna nga siya nakahimo niadtong gamay’ng sayop. Mao nga ako—akong ginadayeg ang maong tawo, usa ka tawo nga hamtung na gayud, o—o magpakalalaki, usab, kung gihunahuna niya nga nakahimo siya og usa ka kasaypanan. Dili nga nangayo g’yud siya ug pasaylo kanako, dili ako ang gipangayoan niya og pasaylo, ngadto kini sa Dios. Busa ako—akong gikalipay kana, kita n’yo. Ang Dios magapanalangin sa atong igsoon, ug sa iyang igsoong ebanghelista.

⁵ Uy, kanang Baptist, nahibalo mo, nahisakop ako mismo sa iglesiang Baptist kaniadto. Miyembro ako sa una sa Missionary Baptist Church. Sa dihang nakigsandurot ako sa mga tawo, nasayod ako kung unsa ang inyong gibati. Nagbati pud ako og ingon niana, mora og puno sa kung unsa nga butang nga akong—dili ko masabtan.

⁶ Mahinumduman ko ang una ko nga kasinatian nga makakita og usa ka pentecostal, didto kini kaniadto sa Dowagiac, Michigan. . . pasayloa ko ninyo, gikan man diay ako kaniadto sa Dowagiac diha sa usa ka pagbiyaheng pagpangisda, ug nga nagabiyahe ako kaniadto gikan sa Dowagiac, padulong ngadto sa Indiana. Ug mao nga nakita ko ang mga ngalan, nga “Jesus” didto sa mga sakyanan ug ingon—anang mga butang, ug naminaw ako sa ilang mga panerbisyo niadtong adlaw. Ug pagkasunod adlaw gihangyo ako nila nga moadto sa entablado, sa pagsulti

og pipila ka pulong, ug akong gibuhat. Ug ako'y . . .Ila akong gipangutana kung asa ba ako kono nga iglesia nahisakop, ug ako silang giingnan nga usa ako ka Baptist.

⁷ Ug niadtong gabhiona aduna sila og usa ka tigulang nga itum nga lalaki nga mao'y magawali, ug siya mga anaa na sa iyang ulahing mga tuig sa pagka-otsenta, ug siya migawas paadto sa entablado. Ang maong tigulang nga lalaki, halos kinahanglan pa gani nila agakon siya paadto didto. Siya'y, nagbisti og usa sa niadtong hatag-as nga pang-ministrong amerikana, velvet ang kuwelyo, ug anaa'y dyutay'ng puting balahibo nga nagapalibot sa kilid niini. Ug akong nahunahuna, "Ang tanan dinhi nga mga tawo ug ang mga teologo, halangdon pa gyud nga mga tawo, naunsa ba nga gipasagdan man nila kining buluhaton nga mahitugyan ngadto sa usa ka tawong sama niana? Bueno, angay nga anaa na lang ang maong tigulang nga lalaki diha sa usa ka lingkuranan kon diin man, nga nakalingkod na lang."

⁸ Ningwali na sila niadtong adlaw mahitungod sa gibuhat ni Jesus dinhi sa yuta. Ug, apan mikuha siya, gikuha ang iyang teksto, nagtoo ko gikan kadto sa Job . . .:7, 20, dili ko masigurado nga mao gayud kana nga Kasulatan. Bisan pa man, mao kini ang kinutlo, o uban nga bahin niini, "Diin ka man sa pagtukod Ko sa kalibutan, sa nagakadungan pag-awit ang mga bitoon sa kabuntagon, ug ang mga anak sa Dios nagkaduyog sa pagsinggit sa kalipay?" Ug siya nagsulti kung unsa ang nahitabo didto sa Langit, samtang nanagsulti sila kung unsa ang nahitabo sa yuta.

⁹ Ug kung asa man nga dapit, sulod sa lima ka gutlo pagkahuman niya sa pagsulti, siya, miabot kaniya ang Espiritu sa Ginoo, ug milukso siya sa hilabihan kahabog gikan sa salog ug dungan nga gipahagtok ang iyang mga tikod. Uy, aduna og halapad nga espasyo kaniadto, halos katunga kadto niining entablado; ug nagalakawlakaw siya, miingon, "Wala lang kamo og igong lawak sa itaas dinhi para kanako aron sa pagwali."

¹⁰ Bueno, anaa ako kaniadto sa mga baynte anyos ang panuigon. Nahunahunaan ko, "Kung—kung kana makapahimo nga buhaton nianang tawong tigulang na, unsa pa kaha ang mamahimo niini alang kanako?" Busa nakita n'yo?

¹¹ Alang sa pagpaningkamot nga ang tanang butang mamahimong ingon kahapsay alang sa atong bag-ong mga igsoon, nga ato gayud silang giabiabi sa atong panagtigum. Akong nakita, nagtoo ko nga ilang nahisgotan ang usa ka pari nga nagalingkod dinhi, siguro; siyempre, ingon nga taga-Ireland, Katoliko ang akong mga kaparyentihan. Ug adunay uban pa, Baptist ug nagkalainlain pa. Tingali medyo nalibog kamo, kaganina. Akong namatikdan nga wala sa mga kaigsoonan ang misulti mahitungod niini, apan nahunahunaan ko nga paningkamotan ko nga itul-id kini. Sa dihang si Igsoong Shakarian . . . Pagkahuman nga ang maayong magwawali dinhi

napuno og ayo sa kalipay, sa pagkahibalo nga ang Pag-abot sa Ginoo nagkahaduol na, siya—siya nagsulti sa dili masabtan nga sinultihan, kanato. Ug aduna kita’y mga maghuhubad nga nagahatag ug paghubad niini. Nga, ang Kasulatan nagaingon, “Kung wala’y maghuhubad, nan humilum sila.” Apan kung—kung nagasulti sila sa laing mga dila ug unya hubaron kini, mamahimo kining propesiya. Mao nga adunay gamay’ng kalibog ingon nga—nga duha sila diha sa usa ra ka higayon. Karon, dili kana usa ka medyo makalibog, kita n’yo; tungod kay, ang usa sa kanila nagahatag og paghubad, ang usa usab nagapropesiya. Kita n’yo? Busa kana’y . . .

¹² Akong nahunahuna nga akong ipasabot sa atong mga kaigsoonan, kung wala nila kini masabtan, tungod kay ang usa kanila hustong nagahatag og . . . Namatikdan ba ninyo ang limitasyon sa oras sa matag usa? Ug ang usa napuno gayud, siya mismo, nga ang Espiritu sa Dios nagapropesiya pinaagi sa usa; nagahubad, ang usa nagahatag sa interpretasyon. Aron nga kini mahimong klaro, nga kamo . . . dili kita . . . Usahay, sa natural nga panghunahuna . . . Sama na lang sa bilihon natong igsoon nga mihangyo og pasaylo karong buntaga. Medyo makapalibog kini ngadto sa tawo nga wala nakasabot. Apan ngadto kanilang nakasulod na, ang mga beterano sa pagpakigbisog diin kita napahimutang, aba, nasabtan nato kana, kung unsa kining mga butanga. Mao nga nahunahunaan ko nga magsulti og usa ka butang mahitungod niini, kung okay lang.

¹³ Karon, ako—akong nahibaloan nga dili kini mao ang lugar aron sa pagsulti niini. Apan sanglit man nga ang tanan nagasulti og ginagmay nga mga butang, ako . . . Nahibalo kamo, nag-ingon kadto nga lalaki, ingon sa maong tigulang nga itum nga lalaki, “wala kamo’y igong lugar alang kanako aron magwali.” Wala kamo’y igong *oras* alang kanako aron magwali. [Ang kongregasyon nagapalapak—Ed.] Medyo hataas nga pagwali.

¹⁴ Usa ka tawo ang nagsulti usa ka adlaw, nag-ingon “Usa ka ministro ang miabot, nahimo siyang usa ka pastor sa iglesia nga mokabat sa baynte na ka tuig. Ug kanunay siyang nagawali nga eksakto sa traynta minutos kada Domingo sa buntag sa iyang simbahan.” Ug ingon niya, “Niining Dominggo sa buntag, tulo ka oras siya nagwali.”

¹⁵ Ug mao nga gipatawag siya sa hunta sa mga diyakono, ug miingon, “Pastor, nagapasalamat gayud kami kanimo.” Ingon pa, “Nasayod kami kanunay nga—nga nagabarug ka alang sa Biblia ug sa mga katarungan Niini.” Ug dayon ingon pa, “Ug imo kami sa kanunay ginatul-id aron mabati namo nga putli kami ug hinlo diha sa atubangan sa Dios. Ug amo gayud ikaw ginapasalamatan, ug nagatoo kami nga ikaw alagad sa Dios. Ug amo gayud ginapasalamatan kadtong mensahe kaganinang buntag. Apan,” miingon, “aduna lamang usa ka butang nga amo gustong ipangutana kanimo.” Miingon, “Giorasan ka namo,

ingon nga usa ka hunta sa mga diyakono.” Miingon, “Kada Domingo sa buntag eksaktong traynta minutos ka ra gyud, ug karong adlaw miabot ka man sa tulo ka oras.” Miingon, “Karon, hinumdumi, ginapasalamatan gayud namo ang matag gutlo niini. Maayo man kadto tanan.” Ginapabati og maayo ang maong tigulang, nahibalo na mo.

¹⁶ Mitubag siya, “Bueno, mga igsoon, sultihan ko kamo kung naunsa kini.” Miingon, “Matag buntag sa dihang moadto ako sa . . . pagatawgon na ako paadto sa pulpito,” miingon, “Nagabutang ako og usa niadtong mga gamay nga Life Savers sa akong baba,” miingon siya, “ug ako lang supsupon kini.” Ug miingon, “Sa diha nga ang maong Life Saver hurot na,” miingon, “moabot lamang kini og traynta ka minutos,” ug ingon pa, “dayon mohunong na ako sa pagwali.” Ingon niya, “Kahibalo ba mo, kaganinang buntag, nahunahunaan ko nga medyo nanobra na ako sa oras. Giluwa ko na kini, butones man diay ang anaa sa akong baba.” [Nangatawa ang kongregasyon—Ed.]

¹⁷ Wala ko’y um-umon nga unsa man, busa nagalaum kita nga wala kita’y makuhang mga butones sa atong mga bulsa. Apan kita . . . Nagalaum ako nga dili kana medyo panamastamas dinhi. Apan ako lamang . . . Kahibalo na mo, bisan ang Dios adunay kinaiyang magpakatawa, kahibalo na mo.

¹⁸ Busa mapasalamaton kami kaayo nga maania dinhi ug nga magkaaduna og niining higayon nga makapag-fellowship, ug—ug sa niining daku kaayong prebilihio nga makapagpikas-pikas og Tinapay sa Kinabuhi sa makausa pa, sa kaugalingon ko nga yano og gamay’ng pamaagi. Kahibalo ko, ingon nga ang mga teologo, sama niadtong lalaki nga nagsulti dinhi kagabii gikan sa Inglatera; uy, dili ko gayud gusto nga makasunod sa usa ka tawong pareha niana, tungod sa akong ikapitong grado lang sa edukasyon. Apan nagalaum ako nga igapasabot sa Dios diha kaninyo ang maong mga kahulogan nga ania sulod sa akong kasingkasing. Kita n’yo? Kung ang akong mga sulti dili husto; ang akong mga tumong, ako—ako masaligon, nga husto gayud.

¹⁹ Karon atong basahon dinhi sa Kasulatan. Kadaghanan kaninyo ang gusto nga mosunod. Ug akong basahon niining buntaga, sa pipila lamang ka gutlo, ang gikan sa Basahon ni Jeremias, nga propeta, sa ika-2 nga kapitulo, ug ako magasugod karon sa nahaunang bersikulo.

Ug ang pulong sa GINOO miabot nganhi kanako, nga nagaingon,

Lakaw ug suminggit ka sa mga igdulungog sa Jerusalem, sa pag-ingon, Mao kini ang Gisulti sa GINOO; Ako nahanumdum alang kanimo, sa puangod sa imong pagkabatan-on, ug ang gugma sa imong saad nga sa pagminyo, sa pagsunod mo kanako didto sa kamingawan, ug sa yuta nga wala matamni.

Ang Israel mao ang pagkabalaan ngadto sa GINOO, ug ang unang bunga sa iyang pagkadagaya: ang tanan nga naglamoy kaniya . . . ug pagaisipon nga sad-an; ang kadautan modangat kanila, nagaingon ang GINOO.

Pamati kamo sa pulong sa GINOO, Oh balay ni Jacob, ug ang tanang kabanayan sa balay sa Israel:

Mao kini ang gisulti sa GINOO, Unsay mga pagkadili-matarung nga nakita sa inyong mga amahan kanako, nga mingtalikod man sila kanako, ug mingsunod sa kakawangan, ug nangahimong kawang?

Ni ming-ingon sila, Hain man ang GINOO nga nagkuha kanato gikan sa yuta sa Egipto, ug nga nagmando kanato latas sa kamingawan, latas sa usa ka yuta nga dili kapuy-an ug yuta sa mga gahong, latas sa yuta sa hulaw, ug sa mga landong sa kamatayon, latas sa usa ka yuta nga wala'y tawong nakaagi, ug . . . wala'y tawong nagpuyo?

Ug gidala ko kamo ngadto sa usa ka yuta sa kadagaya, aron sa pagkaon sa bunga niini ug sa kaayo niini; apan sa nakasulod kamo, inyong gihugawan, ang akong yuta, ug gibuhat ninyo ang akong panulondon nga usa ka dulumtanan.

Ug ang mga sacerdote wala ngani moingon, Hain man ang GINOO? Ug kadtong nanagkupot sa kasuguan wala makaila kanako: ug ang mga punoan usab nanaglapas batok kanako, ug ang mga manalagna nanagpanagna pinaagi kang Baal, ug nanagsunod sa mga butang nga wala'y kapuslanan.

Tungod niini Ako nga . . . nakigbisug pa gayud kanimo, nagaingon ang GINOO, ug sa mga anak sa inyong mga anak makigbisug pa ako.

Kay . . . tabok sa mga pulo sa Kitem, ug tan-awa; ug pagpaadto didto sa Cedar, ug palandunga sa masingkamuton gayud nga, ug tan-awa kung aduna ba'y ingon nianang butanga.

Nagailis ba ang usa ka nasud sa iyang mga dios, diin nga . . . dili man mga dios? apan ang akong katawhan nanag-ilis sa ilang himaya niadtong sa wala'y kapuslanan.

Kahibulong kamo niini, Oh kamong kalangitan, niini, ug kalisang gayud, . . . mag-inusara kamo pag-ayo, nagaingon ang GINOO.

Kay ang akong katawhan nakahimo ug duruha ka kadautan; sila mingbiya kanako ang tuboran sa mga tubig nga buhi, ug sila nanagkutkot og mga atabay, mga atabay nga likian, nga dili kasudlan og tubig.

20 Hinaut nga idugang sa Ginoo ang Iyang mga panalangin sa pagbasa sa Iyang mga Pulong. Ug gusto ko nga—nga kuhaon ang teksto gikan niana, ingon nga, *Mga Atabay Nga Likian*.

21 Sa diha nga, sa pagbasa niining Kasulatan karong buntaga; nga, ang tibuok Kasulatan gituga pinaagi sa pagdihog. Ug nagaanhi kita sa Balay sa Ginoo aron nga matul-id ug aron nga makasabot. Ug usahay nga atong makita ang. . . bisan unsa man nga gamay'ng butang diha sa agianan.

22 Sama niining sundalong lalaki, kaganina lamang, nga nakigsulti kanato ug naghisgot nga ang pipila ka mga butang, nga tingali sa ubang nasud kono aduna na og missile, o—o unsa man nga butang nga ingon nianang ideya, ug kinahanglan gayud nga makakita kita og unsa man nga butang aron mabatokan kana diha sa—sa usa ka pang-militar nga estratehiya.

23 Bueno, mao usab ang nagakahitabo sa sulod sa iglesia, sa usa ka simbahan kon diin nagawali ang usa ka tawo, o didto sa misyon kung usa siya ka ebanghelista. Pagmakakita siya og mga pagpakigbatok, ug butang nga nagsugod pa lamang, nagakahitabo na, bag-ohay pa o kung unsa man kini; kini siya mao ang tawo, kung siya usa ka alagad sa Dios, nga pakgamong kanang butanga palayo sa mga hunahuna sa mga tawo aron magapabilin silang halayo gikan niini. Ug dili nato gusto nga mahitabo kana, nga mapaingon kita sa mga kahimtang nga pareho niana.

24 Karon, sa panahon ni Jeremias dinhi, sa iyang pagpropesiya, mga saisenta na kadto ka mga tuig gikan sa pagkamatay ni—ni Isaias—Isaias. Ug mga saisenta na ka mga tuig kadto nga wala sila og usa ka medyor nga propeta. Aduna kaniadto si Habacuc ug ang ubang minor nga mga propeta, apan si Isaias ang pinakaulahi nga medyor nga propeta. Ug ang katawhan kaniadto, niadtong panahona, wala ni usa nga magpahamatngon kanila. Nangadala na sila. Pero bisan pa niana, mga katawhan sila sa Dios, nangadala lang ngadto niining kahimtang karon nga—nga sa niana nahikaplagan nato sila, sa diha nga miabot si Jeremias aron magpropesiya ngadto kanila. Ug si Jeremias usab kaniadto. . . Nagpropesiya siya niadtong wala pa ang pagpanghingilin, ug siya usab napaingon sa pagkahingilin uban kanila.

25 Ug dayon, siyempre, miabot si Daniel pagkahuman ni Jeremias. Ug nag-ingon si Daniel nga aduna siya'y mga pagsabot, pinaagi sa Kasulatan, mahitungod sa setenta ka mga tuig nga sila mahiadto didto.

26 Siyempre, aduna pa'y laing propeta kaniadto sa taliwala kanila, nga gustong himoon kini nga yugo, sa diha nga ginabutang niya kini sa iyang liog, nga kini usa lang ka gamay nga butang, nga, “Sulod sa duha ka tuig, bueno, igabalik silang tanan sa Dios,” apan lahi kaysa niana ang nahibaloan ni

Jeremias. Ug nasayod na kita kung unsa ang nahitabo ngadto sa propeta nga nagpropesiya og dili mao, namatay siya nianang mao ra mismo nga tuig. Mao nga dili siya katugotan sa Dios nga mangibabaw.

²⁷ Ug karon ato usab namatikdan ang mga kahintang sa mga tawo niadtong adlaw. Karon dili ko tinuyo nga dili ako ninyo masabtan (Ako—wala nako ginatuyo) kung unsa man ang tumong ko nga isulti dinhi, ang pipila ka mga Kasulatan ug gamay'ng mga sinulat dinhi.

²⁸ Naanad ako sa una nga dili ko kinahanglan nga—nga isulat nako ang mga Kasulatan ug ingon nianang mga butang. Apan pagkahuman nga nilagpasan ko na ang edad nga baynte-singko sa makaduhang higayon, bueno, ako—ako dili na makahinumdom sama kaniadto, busa ginasulat ko na ang Kasulatan ug medyo mahibaloan ko na, gikan niana, kung asa na ako paingon. Ug dayon sa pagkadaghang panahon nga nagaampo alang sa mga masakiton, ug uban pa, ug maatua sa gawas ug mawala na usab, wala na ako'y panahon sa pagtuon gayud sama sa angay ko untang buhaton.

²⁹ Karon, apan kining halangdong propeta niadtong panahona, mao si Jeremias, ug siya mora og kapareho ni Amos ug sa uban pang mga propeta nga mitungha. Naukyab siya sa diha nga nakita niya ang kahintang sa nasud. Karon adunay mga lugar . . .

³⁰ Usahay sa diha nga mosulti ka mahitungod sa usa ka nasud, mahimong hunahunaon nga nagapahinungod kini sa usa—usa ka grupo. Dili kini ingon niana. Ang kinatibuk-ang hulagway kini sa usa ka nasud. Ug atong makita, karong panahona, usa—usa ka kaparehong kahintang sa karon nga sama kini kaniadto sa mga adlaw ni Jeremias, nga ang nasud mismo, ang kinatibukan, napaingon na sa, kapin kun kulang, ngadto sa pagsimba sa mga diosdios; daw sa, ingnon ko, napahilayo na gikan sa Dios. Ug nagakahitabo kana, tungod kini sa kahuyang diha sa pulpito kaniadto. Tungod kay, kung ang pulpito nagpabilin lang nga matarung, ug subay sa Pulong sa Dios, maanaa unta ang Dios diha sa matag iglesia sama sa paglihok Niya sa taliwala kanato dinhi. Apan nagpahilayo sila gikan niana. Ug mao kana ang butang nga ako—ako gustong pagahisgotan ning buntaga. Ug karon atong makita kana nga tinuod kaayo kini diha sa matag kapanahonan.

³¹ Nagatoo ko nga si Amos kadto, sama sa akong pagpahinungod kaniya kaganina, nga nag-ingon siya nga siya “dili usa ka propeta, ni anak sa usa ka propeta.” Apan nag-ingon, nga, “Sa diha nga ang leon mingulob na, kinsa'y dili mahadlok?”

³² Ug kung aduna may nakadungog og usa ka tinuod nga leon nga nagangulob didto sa kalasangan, kining mga madungog

ninyo sulod sa mga hawla dinhi mao'y mga miyaw lamang. Apan sa diha nga ang usa niini magangulob sa kalasangan, ang tanan magapatalinghug. Nakahigda na ako didto sa kalasangan, aron mangayam kanila. Ug siya ang hari sa mga mananap, ug, sa diha nga magangulob kana nga leon, bisan ang mga bakukang muhonong sa pagtingog, mao man usab sa tanan. Ang—ang mga ihalas nga iro ug ang—ug ang nagabanha nga mga hyena, ug ang uban pa nga mga mananap, ug sa mga siyagit sa dagko ug gagmay'ng mga unggoy, mga bakukang, halos dili na nimo madungog ang kaugalingon mo nga nagahunahuna; apan bisan sa halayo panguloba ang usa ka leon, ug ang matag bakukang muhunong sa pagtingog. Kita n'yo, ang tanan mahadlok kaniya. Pero bisan pa niana, daghang mga butang ang mahimong mopatay kaniya, apan giila siya ingon nga hari sa mga mananap.

³³ Miingon siya, “Sa diha nga ang leon mingulob na, kinsay dili mahadlok?” Ingon niya, “Unya nagsulti na ang Dios, kinsay makahimo nga dili motagna?”

³⁴ Ug kana, nahunahuna ko, ang kahimtang nga magatagbo niana nga hagit pag-usab sa karon. Ang Dios nagsulti na. Kita n'yo? Ug nakita na nato ang sinulat-sa-kamot diha sa bongbong, mao nga masayon na gayud magpropesiya ug ang makita nga ania na kita sa katapusang panahon.

³⁵ Ug makita nato ang Dios, gikan sa matag bahin sa mga denominasyon, gikan pa sa Katolisismo, ngadto sa tanang mga kasimbahanang protestante, mga Buddha ug unsa pa man, gikan sa India, ug kung asa pa man. Iyang ginatawag ang tanan Niyang katawhan, hiniusa Niya sila nga ginatigum. Ug ako—ako malipayon kaayo tungod niana, ang makita kining adlaw nga nagasingabot. Karon kita. . . Kini—usa kini ka dakung adlaw, usa sa pinakadakung mga prebilihiyo.

³⁶ Kana, kung gikinahanglan ko, kung nahibaloan ko sa wala pa nagkaaduna og usa ka kalibutan, sa dihang kita mga kalag kaniadto nga kabahin sa Dios, nga mao gayud kita, tungod kay kita uban na Kaniya sa wala pa ang pagkatukod sa kalibutan. Tungod kay, adunay usa lamang ka matang sa Kinabuhing Wala'y Katapusan, ug kana ang Dios. Ug kita kabahin Niya. Dili gayud kita kaniadto ingon nga makahibalo ug—ug makapaghunahuna, ug ingon nga tawo na; kondili atua kita sa Iyang mga hunahuna kung unsa kita, sa wala pa ang pagkatukod sa kalibutan. Tungod kay, kita kabahin Niya, sama sa akong anak nga lalaki nga kabahin ko, ug ako kabahin sa akong amahan, ug uban pa. Mga anak kita nga lalaki ug mga anak nga babaye sa Dios, pinaagi sa Iyang daan nang pagkahibalo.

³⁷ Ug balik kaniadto, kung nahibaloan ko lang kaniadto sama sa nahibaloan ko karon, ug mahimong gilantaw ko ang kinatibuk-an sa panahon, ug mahimong misulti Siya kanako,

“Unsang panahona ang gusto nimo nga dinha ka niana mabuhi?” Mahimong giingon ko nga sa mismo niining panahona karon, sa bisperas mismo sa—sa paghinapos sa kasaysayan sa kalibutan, ug sa umalabot nga Gingharian sa Dios nga pagatukuron dinhi sa yuta. Kini sa akong hunahuna ang pinakamahimayaong panahon sa tanang kapanahonan, mao ang karon mismo.

³⁸ Atong makita dinhi nga ang Israel giakusahan sa propeta, sa diha nga giordenahan siya ug gipadala siya sa Dios. Giakusahan sila tungod sa duha ka dagkung mga sala. Ug gusto natong hisgotan kanang duha ka mga butang nga ilang nahimo. Ug, gikan dinha, gusto natong magpadayon pa pinaagi niini. Karon, mitalikod sila gikan sa Dios, ang Tuboran sa buhi nga tubig, ug nanagbuhat sila alang sa ilang mga kaugalingon og mga atabay. Gitalikdan nila ang butang nga gihatag sa Dios kanila, ug nanagbuhat alang sa ilang mga kaugalingon og butang nga sila mismo ang nagbuhat. Ug kini nga mga atabay, inyong mamatikdan, aduna siya’y, nangaliki ug nagaagas ang mga niini.

³⁹ Karon, ang usa ka atabay nga likian dili makapapundo og tubig. Pagaagasan kini. Napadaku ako kaniadto didto sa usa ka umahan, ug nasayod ako kung unsa gayud ang usa ka karaang atabay, ug ang kalisod nga aduna kami niini.

⁴⁰ Ug kining ginaagasan nga atabay usa—usa ka maayo gayud nga larawan, sa akong hunahuna, bahin sa niining panahon, nga sa diha (ang atong) tanan-tanan nga atong gipaningkamutan nga buhaton, aron nga hiusahon ang mga tawo, tipunon ang mga tawo, hiusahon ang mga iglesia, nahimo kini kanunay nga anaa lang diha sa pang-intelektuwal nga mga pagpaninguha. Gipaningkamotan nato nga buhaton nga Baptist ang tanang mga Methodist, ug bali-bali na, ug ang nagkalainlain pa nga mga denominasyon. Ug dili kadto programa sa Dios, sa sugod pa lang.

⁴¹ Aduna ang Dios og usa lamang ka dapit tagboanan. Nag-ingon Siya diha sa Basahon sa Exodo, nga, “Akong gipili ang dapit nga pagabutangan sa Akong Ngalan, ug mao lang kana ang dapit kon diin Ko pagatagboon ang mga tawo.” Ug Siya nagpili og usa ka dapit nga pagabutangan sa Iyang Ngalan. Ug kung asa Niya gibutang ang Iyang Ngalan, dinha Niya pagatagboon ang Israel. Aduna Siya’y usa ka dapit kon diin Niya ginatagbo ang Iyang iglesia sa karon, ug Iyang gipili kana nga Ngalan, ug kana nga Ngalan mao si Jesus Cristo. Ug dinha kon diin Niya ginatagbo ang matuod nga magtotoo, pag anaa na siya kang Jesus Cristo. Mao kana ang gipili sa Dios nga pagabutangan sa Iyang Ngalan.

Moingon ka, “Ngalan sa Dios?”

⁴² Nag-ingon Siya, “Ako mianhi sa Ngalan sa Akong Amahan.” Busa mao kana kon diin gibutang sa Dios ang Iyang Ngalan, diha kang Cristo. Ug diha kang Cristo diin kitang tanan magkatagbo-

tagbo ilalum sa giula nga Dugo, ug diha aduna ang tinuod, matuod nga pagpakig-fellowship.

⁴³ Gihimo sa Dios sa sinugdanan ang Iyang programa, didto sa tanaman sa Eden, kon diin sa maong dapit Iyang pagatagboon ang tawo, ug dili kadto sa mga pang-intelektuwal nga pagpanabot; kay kung mao pa, eksaktong nakasubay unta si Eva sa Iyang programa. Apan nasayod kita nga ang iyang pagdawat sa intelektuwal nga pagpanabot ni Satanas, “Siguradong, dili buhaton sa Dios,” apan nag-ingon gayud ang Dios nga pagabuhaton Niya! Ug busa gipili Niya kaniadto ang dapit sa pagtubos, ug kini pinaagi sa Dugo, ug dili pinaagi sa pang-intelektuwal nga panabot.

⁴⁴ Mao nga nagasumbag lang kita sa hangin, apan tawhanong kinaiyahan lamang kini nga—nga maningkamot ang mga tawo nga—nga buhaton kana. Kung aduna pa kita’y oras, mahimo nato kining pikaspikason sa makadaghang bahin, apan dili ko gusto nianang butones. Busa paninguhaon natong himoon kini sa ingon ka yano nga mahimo, “nagaagas nga mga atabay.” Ug atong makita nga kini—kini nga nahitabo na gayud pag-usab, usa kadto ka larawan mismo sa atong panahon nga atong ginapuy-an, mahitungod sa tanan natong mga pagpaningkamot.

⁴⁵ Ug dili sa wala’y paghatag og bili sa matag panglimbasug ni kinsa man nga alagad sa Dios, nga bisan na lang sa paghingalan sa Ngalan ni Jesus Cristo. Angay siyang pagapasidunggan bisan na lamang sa paghingalan sa Iyang Ngalan nga may pagtahod ug pagrespeto. Ug ang pagkadakung sistemang pang-ebanghelistiko nga mikuyanap sa yuta, ug uban pa, sa niining katapusang mga adlaw, sa hunahuna ko, dili gayud nato sa gihapon mahiusa ang kasingkasing sa mga tawo hangtud madala nato sila ilalum sa Dugo ni Jesus Cristo. Kana lamang ang dapit nga luwas gayud kita.

⁴⁶ May usa ka tawo mitawag kanako dili pa dugay, gikan didto sa Sidlakan, ug nag-ingon, “Igsoong Branham, hingdunggan ko nga mibalhin ka na didto sa—sa Arizona, ug ikaw nagmugna og usa—usa ka dapit didto nga diin adunay kasiguruhan.” Ug sama sa inyo nang nahibaloan kung unsa ang pag-abot sa Mensahe, ug nga ang Ginoo nagsulti kanako kung unsa ang mahitabo sa Alaska, ug kung unsa nga mahitabo kini hangtud sa California, ug ingon niana na gayud kini. Ingon nila, “Karon kung kana nagatay-og, ug tanan na, hain na ang luwas nga dapit?”

⁴⁷ Ingon ko, “Adunay usa lamang ka luwas nga dapit nga nahibaloan ko. Kana anaa kang Cristo. Kadtong mga anaa na kang Cristo, ang mao’y . . .” Kini lamang ang usa nga akong nahibaloan.

⁴⁸ Karon si Jeremias gitawag, usab, “ang nagahilak nga propeta.” Ug tungod nga, nagtoo ako, nga ang hinungdan nga kining propetaha nagadangoyngoy—nagadangoyngoy, diay,

tungod nga siya ingon nga usa ka propeta (ug ang Pulong sa Ginoo nagaabot sa mga ingon niini) ug nakita ang mga katawhan nga nagakinabuhi subay sa ilang mga tradisyon, ug naghunahuna ang mga niini nga okay lang, ug wala man lang paagi aron mahipabalik sila.

⁴⁹ Kay, padiretso silang paingon ngadto sa pagkahingilin, tungod nasayod kita nga pagaanihon mo kung unsay imong gipugas, bisan kinsa ka pa, unsa ka man. Ug kita ingon nga usa ka nasud nag-ani. . . o nagpugas, diay, ug kinahanglan nga atong pagaanihon. Ako magahisgot ugma, kon itugot sa Ginoo, sa hapon, mahitungod sa *Mga Kasakit Sa Pagpanganak*; ug akong—ug mahisgotan ko kana didto, nga wala kita’y malutosan og bisan unsa man. Ato gayud pagaanihon kung unsay atong gipugas.

⁵⁰ Ug kung tugotan kita sa Dios nga makalusot sa atong mga pagpangtuis sa Cristianismo karon, ug pagpangtuis sa mga tawo ngadto niining mga butanga nga ginatawag nila og Cristianismo, sama sa giingon ni Igsoong Moore sa makausa, “May obligasyon Siyang moral nga pabangonon ang Sodoma ug Gomorra, ug mangayo’g pasaylo sa pagsunog kanila.” Husto kana, tungod kay ang Dios nagapabilin nga matarung. Ug kon diin man wala’y katarungan; kini—angayan lang kini ngadto sa Iyang pagkabalaan ug sa Iyang Pulong nga ginapaani Niya sa mga tawo kung unsa ang ilang gipugas, ug pagaanihon gayud nato kana.

⁵¹ Karon himatikdi nga gibiyaan nila Siya, ang Tuboran sa buhing mga tubig, ug nanagbuhat og ilang kaugalingong mga atabay.

⁵² Karon adunay tawo tingali dinhi nga wala makasabut kung unsa ang usa ka atabay. Ang atabay usa ka hinimo’g tawo nga pundohanan sa tubig nga ginasulayang ipuli sa lugar sa usa ka tuboran. Usa ka butang kini nga kinalot sa tawo. Ug pila ba ang nakahibalo kung unsa ang atabay? Maayo. Bueno, daghang mga tawong taga-probinsya ang ania dinhi karong buntaga. Mao nga sila . . . mahinumduman ko ang karaang atabay sa among lugar, kung unsa ang hitsura niini, ug kanunay akong nahadlok sa paginom gikan sa maong butanga. Kadto usa—usa ka pundohanan nga hinimo’g tawo. Ug dili gayud kini mahimong saligan. Dili ka puwedi magsalig sa usa ka atabay.

⁵³ Karon ang bisan unsa man nga butang nga hinimo sa tawo kasagaran dili gayud maayo. Apan sama lamang nga ang—ang Ginoo nagtino og oras diha sa—sa—sa pagtuyok niini, ug nagabiyo ang kalibutan; sa matag tuig, sa matag higayon nga paglibot niini, kada adlaw, kada oras, ug ang pagsalop sa adlaw, ug wala kini nagakapakyas. Apan ang pinakamaayong mga orasan nga atong makuha, mapakyas sa makadaghang minuto sulod sa usa ka bulan, sa wala’y pagduda. Apan, nakita n’yo, ang tanang butang nga ginabuhat sa Dios hingpit gayud, ug kung

unsa man ang ginabuhat sa tawo dili kini hingpit. Busa nganong dawaton man kung unsay ginabuhat sa tawo, kung mahimo kang magkaaduna og hingpit?

54 Kanunay ko nang giingon kana mahitungod kanatong mga katawhang Pentecostal. Kita n'yo, nahibalo kita, ug dili kita—dili kita siyempre nahigawas sa kahan-ayan, sa Dios, wala kita niana nagatoo; apan nahibalo usab kita nga sa taliwala nato aduna diha kanato og mga tawo nga nagapaninguha sa pagsundog-sundog sa uban nga tawo. Kana ingon nga pagkatawhanon lamang. Paningkamotan nila kana nga buhaton. Ila na kanang gibuhath diha sa Biblia, “Usa, ‘Ako iya ni Pablo,’ ‘Ako iya ni Silas,’” ug uban pa. Apan, ilang, gipaningkamotan nilang sundogon kung unsa ang gibuhath o ang ginabuhat sa uban.

55 Apan nganong modawat ka man og usa ka sayop nga pagpanundog, kung ang kalangitan napuno sa mga tinuod nga butang, sa diha “ang saad alang kaninyo, ug sa inyong mga anak”? Nganong modawat man kita og usa ka butang nga lahi ra? Nganong modawat man kita og kredo o dogma, sa diha nga ang Biblia mao ang wala’y sambog nga Pulong sa Dios? Nganong ato man sulayan nga dugangan o kulangan, sa diha nga ang Ginoong Jesus nag-ingon man diha sa Pinadayag 22:18, “Ang si kinsa man nga magataktak og usa ka Pulong gikan Niini, o magadugang og usa ka pulong ngadto Niini, pagataktakon ang iyang bahin gikan sa Libro sa Kinabuhi”?

56 Sa diha nga una sa Dios gipahamutang ang tawo sa yuta, giingnan Niya sila nga magkinabuhi pinaagi sa Iyang Pulong. Karon ang Pulong sa Dios sama sa usa ka kadina, nagaagi ka palabang sa impiyerno pinaagi Niini; ug ang kadina pinakamaayo lamang diha sa pinakamahuyang nga sumpay niini, ug gusto sa Dios nga atong tipigan ang matag Pulong Niini. Karon mao kadto ang pinakauna sa Biblia; ang paglapas lang sa usa ka Pulong, mao ang naghulog sa tawo ngadto sa usa ka kangitngitan sa kamatayon.

57 Si Jesus miabot sa kinataliwad-an sa Biblia, ug nag-ingon Siya nga, “Dili lamang sa tinapay mabuhi ang tawo, kondili sa matag Pulong.” Dili lamang nga kabahin sa mga Pulong, o nobenta’y-nuwebe diha sa usa ka gatus; kondili sa matag Pulong, pareho lamang kang Eva ug Adan kaniadto.

58 Ug sa katapusan sa Biblia, Pinadayag 22:18, nag-ingon Siya nga, “Ang si bisan kinsa man nga magataktak og usa ka Pulong gikan Niini, o magadugang og usa ka Pulong ngadto Niini!”

59 Busa ngano man nga kinahanglan pa nato magpasulod Dinhi og mga ideya sa usa ka tawo mahitungod sa mga butang, sa diha nga kini na ang Iya Mismo sa Dios nga Panghunahuna mahitungod niini? Gusto natong dawaton kung unsa ang Iyang

giingon. Ug kini usab nahisulat na, “Pasagdi nga ang matag pulong sa tawo bakak, ug ang Kanako ang Kamatuoran.”

⁶⁰ Mao kana kung unsa ang nahitabo niining propeta. Sa mga adlaw ni Jeremias, usa siya kaniadto ka propeta, atua kaniya ang Pulong sa Ginoo. Ug kining usa ka tawo nagapaninguha sa pagpasulod og usa ka butang ngadto Niini, karon dili kini puweding kasaligan. Ug ginapahisama ko kini nga mga pundohanan karon ngadto niining mga sistema nga ginapaninguhaan natong dawaton, ug aron nga ihulip sa lugar sa orihinal nga Pulong sa Dios.

⁶¹ Kay, wala’y bisan unsa man nga makapuli Niini. Ang Dios kini. “Sa sinugdan mao na ang Pulong, ug ang Pulong uban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato.” Ug ang mga Hebreohanon 13:8, nag-ingon, “Siya mao sa gihapon kagahapon, karon, ug hangtud sa kahangturan.” Unsaon man nato sa pagkahilayo gikan Niana? Kini mao gayud ang Kamatuoran. Nagapabilin Siya nga mao sa gihapon. Siya mao sa gihapon diha sa matag sukaranan.

⁶² Mao kana ang hinungdan nga inyong ginakalipay Kini, kamong mga Baptist ug mga Methodist, ug Katoliko ug mga Presbyterian, ug uban pa, ginakalipay kana nga Presensiya. Adunay kon asa man, sulod kaninyo, nga gidawat ninyo ang Dios. Mahimong usahay diha sa pamaaging intelektuwal, mahimong nabati ninyo ang Gahum sa Dios, ug ikaw usa ka alagad sa Dios; apan sa diha nga makahimo ka og pagduol gayud sa Dios, ug maila ang imong nahimutangan diha Kaniya, ingon nga usa ka anak nga lalaki o usa ka anak nga babaye sa Dios, kana mao ang nagadala og dakung kalipay kanimo, nga tinuyo sa Dios nga mamaimo.

⁶³ Karon atong mamatikdan sa San Marcos, sa ika-16 nga kapitulo, si Jesus wala nag-ingon, “Panglakaw kamo sa tibuok kalibutan, ug—ug—ug magpanudlo.” Siya miingon, “Panglakaw kamo og iwali ang Maayong Balita.” Iwali ang Maayong Balita, mao, ang pagpadayag sa Gahum sa Balaang Espiritu! “Panglakaw kamo sa tibuok kalibutan, ug igapadayag ang Gahum sa Espiritu Santo.”

⁶⁴ Sa pagpakighinabi ko ngadto sa usa ka igsoong lalaki, nga usa sa mga tigpasiugda sa . . . akong panagtigum sa India, didto sa Bombay, didto sa South Africa ug sa nagkalainlaing mga dapit, kon diin gitudlo Kini sa mga misyunero ingon nga usa ka pulong o ingon nga usa ka pang-intelektuwal nga panabot. Apan usa ka adlaw didto sa panagtigum, sa dihang mikanaug ang Balaang Espiritu, Mismo, ug nagluwas og katloan ka libo ka mga lumad nga nakabukot og habol diha sa usa ra ka pagtawag didto sa altar, ug diha mismo sa mao rang dapit diin sila nagatindog. Mga babaye nga mga nagatindog didto, nga kanhi ingon ka hubo halos sama sa dihang gihimugso sila nganhi sa kalibutan, ug sa

mao mismong takna nga ilang gipataas ang ilang mga kamot aron dawaton si Cristo . . .

⁶⁵ Ug miabot ang Balaang Espiritu sa maong dapit ug nag-ayo sa kaluhaa'g lima ka libo ka mga tawo diha sa usa ra ka higayon, gikan sa mga wheelchair, sa mga higdaanan ug mga stretcher. Gitawag ako sa mayor sa maong siyudad, pagkasunod nga adlaw, gipakita niya kadtong mga van nga puno niini nga nangagi didto sa dalan.

⁶⁶ Silang mga babaye nga nagatindog didto, nga wala'y sapot, mga wala'y hibangkaagan nga hubo diay sila. Apan sa diha nga miabot kanila ang Balaang Espiritu, ilang gikiyugpos ang ilang mga kamot nga ninglakaw pahilayo sa mga lalaki.

⁶⁷ Ug ako natingala kung naunsa ba nga kita sa Amerika nga gitawag ang atong mga kaugalingon nga usa ka Cristianong nasud, ug nga anaa sa Presensiya sa Dios; ug kita matag tuig, ang atong kababayen-an, misamot pa sa pagpanghubo. Ug kamo angay nga magsul-ob og dugang pa. Ug sa dugang pa nga si Cristo ang inyong ginasul-ob, dugang pa nga inyong mamatikdan ang kaugalingon ninyong mga kahimtang. Makita ko usahay kung unsa manggawi ang mga tawo diha sa dalan, nahibulong ako kung eksaktong anaa ba kini sa hustong panghunahuna. Daw sa dili nila kana nahibaloan sa diha nga ginabuhat nila kana, ang ilang ginabuhat, ginahimo nila ang ilang mga kaugalingon nga usa ka paon alang sa yawa, ug aron sa paghatud og mga kalag ngadto sa impiyerno. Husto kana. Apan ang kalibutan anaa sa usa ka pagkadautan sama niini kaniadto sa mga adlaw ni Jeremias.

⁶⁸ Karon balik sa atabay. Karon. Kining atabay dili kasaligan tungod nga dili kini mismo mahimong pun-on ang kaugalingon niini sa iyaha lang. Ug kinahanglan niini magadepende sa lokal nga mga ulan aron mapuno kini, ang lokal nga mga ulan o ang lokal nga mga rebaybal, ang magkaaduna og diyutay'ng rebaybal *dinhi* ug diyutay'ng rebaybal *dinha*, o uban pa, aron mapuno kini. Mao nga dili kini kasaligan. Dili niini mahimong pun-on ang kaugalingon niini. Kulang gayud kini, diha sa kaugalingon mismo niini. Dili niya kini mahimong buhaton. Ug kinahanglan niini magadepende sa mga ulan, aron mapuno kini.

⁶⁹ Unya atong himatikdan kung asa niini—niini ginakuha ang ulan niini, kung asa niini ginakuha ang tubig, ang atabay. Nagagikan kini sa atop sa mga kamalig, sa mga payag, kon diin ang tanang hugaw didto ginapalid sa mga abog, kini ginabanlas tanan mismo sa ulan, ug diretso paubos ngadto sa atabay, usa ka pundohanang nga hinimo'g tawo. Nahimo na kini mismo nga halos sama na sa usa ka awasanan sa hugaw. Ug ginahugasan niini ang atop sa kamalig diin ang tanang mga mananap, ang baho sa mga kamalig, ug uban pa, ug didto nangapundo. Ug ginahuyup pa gyud sa hangin ang—ang abog ug mga ingon niana

ngadto sa kamalig, unya moabot ang ulan ug banlason kini, sa ulan, mismo.

⁷⁰ Ug unya ang tubig ginapaagas pinaagi sa usa ka hinimo'g tawo nga sandayong palahus sa usa ka hinimo'g tawo nga agasanan, paingon sa usa ka hinimo'g tawo nga pundohananan. Ug unya pagkaagas niini didto, mahugaw kini, pagkahugaw niini kaayo nga kinahanglan nimong butangan og usa ka tela nga pangsala niini, o dili mo kini mahimong imnon. Karon, kita n'yo, nagakabanlas kini gikan sa atop, pinaagi og usa ka hinimo'g tawo nga sandayong, hinimo'g tawo nga agasanan, ngadto sa usa ka hinimo'g tawo nga pundohananan og tubig. Ug unya aduna pa kini og usa ka hinimo'g tawo nga salaanan sa ibabaw niini, aron masigurado nga ang uban sa mga insekto ug ingon nianang mga butanga dili mahiapil.

⁷¹ Karon, karon matatikdan nato, sulod niining pipila ka mga adlaw human nga ang mga tubig mipabilin, ngadto niining hinimo'g tawong denominasyon, o pundohananan. Pasayloa ako. Pasayloa ko. Bueno. Pagkahuman niini—pagkahuman nga naagasan kini, sa tanang matang sa mga teolohiya ug naagasan sa ingon nianang mga butang; makita nato karon, sa diha nga mipabilin na kini didto sulod sa pipila ka adlaw, mibang-og na kini.

⁷² Ug si bisan kinsa nahibalo, nga diha sa kasaysayan sa iglesia, pag-magpadala ang Dios og usa ka butang, usa ka mensahe, ug kini lab-as gikan sa Dios. Unya pagkahuman na sa—sa kinabuhi nianang magtutukod, o mahimong unsa man kini; tawgon man ninyo siyang repormador, o unsa man nga gusto ninyong itawag niini. Human sa iyang kamatayon, sila dayon nagaporma og usa ka sistema ug nagatukod sila og usa ka organisasyon. Ug sa dihadhiha nga nagahimo sila og organisasyon gikan niana, nagakamatay kini dayon diha mismo. Dili na gayud kini makabangon pag-usab. Ingon niini ang nagakahitabo ngadto niini sa matag higayon, nagaatras, dire-diretso nagaatras.

⁷³ Sa paghatag og katahuran sa niining Katolikong pari nga nagalingkod dinhi; sa diha nga giorganisa sa Dios ang iglesia . . . o, wala kini giorganisa, wala gayud ang Dios nag-organisa og usa ka iglesia. Wala Siya sa ingon niana nga matang nga buluhaton. Anaa Siya diha sa pagkatawo pag-usab, dili sa pag-organisa, mao nga sa dihang gisugdan sa Dios ang iglesia sugod niadtong Adlaw sa Pentecostes. Ug unya didto na sa Nicaea, sa Roma, giorganisa nila kini, ug didto kon diin nawad-an kini og Gahum.

⁷⁴ Dayon miabot kita ngadto sa repormasyong Lutheran, ug usa kadto ka daku nga butang. Gihatag ang Pulong sa Dios, “Ang matarung mabuhi pinaagi sa pagtoo.” Ug sa dihang gibuhat nila kadto, imbis nga mouswag, silang tanan, silang tanan nga nagahiniusa ug paabante nga nagamartsa, nagtukod sila og usa

ka iglesiang Lutheran, gibulag ang ilang kaugalingon gikan niini nga pundok, ug dayon namatay kini.

⁷⁵ Dayon gipatungha sa Dios si John Wesley, dala ang pagkabalaan, ang mensahe sa ikaduhang buluhaton sa grasya, ug usa kadto ka maanindot nga butang. Apan pagkahuman ni Wesley ug ni Asbury, ilang giorganisa kini, namatay kini.

⁷⁶ Dayon miabot ang mga Pentecostal uban ang pagpanag-uli sa mga gasa. Maayo sila kaniadto, unsay nahitabo? Giorganisa kini ug namatay kini. Eksaktong mao gayud.

⁷⁷ Karon sa taliwala niining tanan, ang Dios nagatawag sa gihapon sa kadtong mga nahabilin gikan sa matag usa niadtong mga henerasyon. Mao gayud. Ug kini na ang atong panahon sa paggawas, nga magkatipon tanan. Ug mao kana ang sa hunahuna ko, aduna og daku nga bahin ang Full Gospel Business Men sa pagguba niini nga mga pader, ug nagaingon nga, “Wala may kalainan kanato. Maghiusa kita ug nga simbahan ang Dios ilalum sa usa ra ka sukaranan, dili nga ilalum sa usa ka organisasyon.” Kung sa organisasyon kini, mohawa g’yud ako niining entablado karon mismo. Wala ako’y kahilambigitan og bisan unsa man bahin niini.

⁷⁸ Kung unsa man kini, kinahanglan nga usa kini ka pagpakig-fellowship, ug dili nga usa ka pagpakig-fellowship diha sa kung unsa man nga kredo. Kondili pagpakig-fellowship diha kang Cristo, pinaagi sa gahum sa Iyang pagkabanhaw, kana mao ang butang nga nagadala og Kinabuhi. Nagahatud kini og pagkatawo pag-usab.

⁷⁹ Ug sa dili pa mahimong moabot ang pagkatawo pag-usab, atong nahibaloan nga aduna usâ og pagkamatay sa dili pa ang maong pagkahimugso. Ug mahugaw ang pagkahimugso, bisan pa kung unsa kini nga matang sa pagkahimugso. Sa tangkal man kini sa baboy, o—o bisan asa man kini, mahugaw kini. Ug mao man usab ang Pagkatawo pag-usab, nagapahimo kini kanimo sa pagbuhat og mga butang nga sa kasagaran dili nimo mahunahuna nga imong pagabuhaton. Apan sa dihang ikaw andam na nga mamatay sa imong kaugalingon, dayon ikaw natawo na pag-usab, usa na ikaw ka bag-ong binuhat diha kang Cristo Jesus, kung ingon-ana ang mga butang, nagaabli na ug ang kinabuhi mamahimo nang usa ka bag-ong panlantaw alang kanimo, tungod kay imo nang gidawat ang Persona ni Jesus Cristo, ug dili sa kung unsa nga teoriya o kung unsa man nga kredo.

⁸⁰ O, bisan ang sinulat nga Pulong, kinahanglan Kini nga buhion sa Balaang Espiritu. Bisan pa kung unsa ka daghang teolohiya ang imong naangkon, nagapabilin kini nga patay dinha. Mahimong magkaaduna ako og usa ka hakop nga trigo; gawas nga kini moabot ngadto sa proseso kon diin mahimo kining buhion, dili gayud mabuhi ang maong trigo. Ug mahimo

kang magkaadunay degree sa pagka-doktor, Ph., LL., bisan unsa pa man ang gusto mo; apan gawas nga ang Espiritu Santo mokanaug ug buhion kini kanimo, ingon nga usa ka personal nga kasinatian diha sa Dios, ang trigo kung ingon-ana wala gayu'y kapuslanan. Wala'y kapuslanan ang inyong nakat-onan.

⁸¹ Sama sa giingon niining tawong taga-Inglaterra sa miaging gabii dinhi, nanghibulong ako'g maayo niadto. Ang tanang nahibaloan niya, sama kang Pablo, gikinahanglan niyang kalimtan ang tanan niyang nahibaloan, aron nga makaplagan niya si Cristo, buhaton ang mga butang nga wala niya mahunahunaan nga buhaton niya.

⁸² Apan sa ingon niana nga paagi nagapamuhat ang Dios, Iya kitang ginapakaulawan diha sa atong mga sistemang edukasyon. Dili nga ginapaninguhaan ko nga dapigan pa hinoon ang pagkawalay-hibangkaagan, kondili ginapaninguhaan ko nga isulti kaninyo ang kalainan niini. Dili gayud makahatud og Kinabuhi ang edukasyon. Ang Espiritu sa Dios ang gikinahanglan aron maghatud og Kinabuhi, ug kana nga Kinabuhi dili kinahanglan magagikan sa pang-intelektuwal nga rebaybal. Kinahanglan magagikan kini diha sa Biblia, rebaybal sa Pulong, ug kana nga Pulong mao ang mao ra kagahapon, karon, ug hangtud sa kahangturan. Ug sa diha nga mokanaug Kini karon, ug maghatag og kinabuhi, imong maangkon ang pareho ra nga resulta nga imong makuha diha sa mga Buhat 2. Tukma gayud. Ingon niana na Kini sa una pa, ug kanunay nga mamahimong ingon niana Kini, tungod kay ang Espiritu sa Dios kini ang mao'y nagapahamutang sa palibot diha sa angay nga kahimtang niini.

⁸³ Nagkinahanglan og tukma nga kahimtang ang palibot aron nga mahimo ang mga butang. Mao kana'y hinungdan nga kamong mga tawo gikatudloan sa una pa, "Dalha ninyo ang inyong mga anak dinhi." Bueno, siguradong husto gyud kana. Nalipay ako nga makita ang akong anak nga babaye, si Rebekah, nga misulod ug naglingkod, dili pa lang dugay. Ang uban kaninyo nakakita kanako nga nagkidhat diha sa usa ka babaye, ang anak ko nga babaye kadto, mao nga mitambong siya ug milingkod. Gusto ko nga madawat niya ang bautismo sa Espiritu, ug mao nga ania siya dinhi sa panagtigum. Mao kana ang katuyoan niini. Nagkinahanglan kini og tukma nga kahimtang sa palibot.

⁸⁴ Sama sa ginaingon kaniadto sa tigulang nga si Doktor Bosworth, "Mahimo mong kuhaon ang usa ka itlog sa himungaan nga manok ug ibutang kini ilalum diha sa usa ka itoy, makapapusa kini sa usa ka piso." Ngano man? Tungod kay kini usa ka itlog ug nagkaanaa kini og igong kaangay nga kahimtang sa palibot.

⁸⁵ Dili mahinungdanon kanako kung ikaw man usa ka Methodist, Baptist, Presbyterian; diha sa usa ka tukmang kahintang nga palibot, makapapusa kini og usa ka bag-ong natawo pag-usab nga anak sa Dios. Kini mao ang tukmang kahintang sa palibot ang mao'y nagapahimo niini, bisan unsa pa nga pang-denominasyon nga marka ang aduna ka.

⁸⁶ Niadtong nagabantay pa ako og panon sa mga baka. Namatikdan ko ang magbalantay sa lasang nga sa diha nga dalhon na namo ang mga baka sa kalasangan, paadto sa—paadto sa mga sibsibanan didto sa mga rantso, ug ipahamutang sila didto sa kalasangan. Motindog siya didto ug bantayan ang mga baka samtang nagaagi diha sa pultahan, nga pagawas sa koral. Wala niya kaayo gihatagan og igong pagtagad ang mga marka, tungod nga atua didto nagaagi ang tanan na nga matang sa mga marka sa baka. Apan dihay usa ka butang nga iyang gibantayan, ang marka sa dugo diha niini. Kinahanglan nga usa ka puro Hereford kini o dili kini mahimong makagawas paingon sa lasang, tungod kay ang Hereford Association ang mao'y nagapasibsib dinha nianang kalasangan. Aduna kini kinahanglan og usa ka marka sa dugo niini, aron magapabilin nga husto ang pagpaliwat niini.

⁸⁷ Ug sa hunahuna ko mamahimong ingon niana kini sa Adlaw sa Paghukom. Dili Siya mangutana kanako kung ako ba'y Methodist, Baptist, Pentecostal, o Presbyterian, apan pangitaon Niya kadtong marka sa Dugo. “Kung makita Ko ang Dugo molabay Ako sa ibabaw kaninyo.” Mao kana'y pinaka-importante.

⁸⁸ Busa atong makita nga kining mga atabay, pagkahuman nga nagpadayon kini didto sa hamubong panahon, nahimo kining...nagakalang-og kini ug dili na kini mapuslan. Ug dayon nagakahimo kini, usab, nangahimo nang puy-anan sa mga baki ug mga tabili ug mga bitin ug mga insekto ug mga kagaw, ug sa kung unsa pa, tungod sa pagkalang-og niini ang mao'y nagpaingon niana niini. Mahulagway ba nimo, nga midahili kini gikan sa atop sa usa ka kamalig, o gikan sa usa ka balay nga haduol sa kamalig, o hain man nga anaa ang mga mahugaw, unsa na kaha nga matang sa mga insekto ug mga kagaw, ug tanan na, ang midahili sa niining atabay?

⁸⁹ Karon, kini usa ka tukmang panig-ingnan sa bisan unsa man nga matang sa usa ka hinimo'g tawong sistema. Usa siya ka kapakyasan, sa sugod pa lang. Kana ang hinungdan nga nagkinahanglan siya og usa ka Manluluwas. Dili niya maluwas ang iyang kaugalingon, wala siya'y mahimo og bisan unsa man alang niini. Siya'y nawala, sa sugod pa lang. Siya natawo sa kalibutan, nga makasasala na, mianhi siya sa kalibutan nga nagapamakak. Siya usa na ka bakakon, sa sugod pa lang, busa unsaon man pagkahimo nga makabuhat siya og bisan

unsa man alang sa iyang kaugalingon? Unsaon man sa usa ka balaang tawo?

⁹⁰ Wala'y balaang tawo. Wala'y balaang iglesia. Ang Balaang Espiritu kini! Dili nga usa ka balaang iglesia, usa ka balaang katawhan; ang Balaang Espiritu kini diha sa taliwala sa mga katawhan, mao kana kung unsa kini. Amen. Dili nga usa ka balaang bukid diin kaniadto si Pedro ug sila nagtindog; dili balaan ang mao nga bukid. Apan ang balaang Dios kini, nga anaa sa bukid, nga nagpahimong balaan niini. Dili nga usa ka balaang tawo; kini ang Espiritu Santo nga nagapanglihok diha nianang tawhana, mao'y kung unsa ang nakapahimong balaan niini. Dili ang maong tawo; kondili ang Persona sa Espiritu Santo! Dili kini ang maong tawo; tungod kay, usa lamang siya ka tawo, "nga natawo sa sala, giumol diha sa kadautan, mianhi sa kalibutan nga nagapanulti'g bakak."

⁹¹ Bisan unsang hinimo'g tawong sistema ipailalum siya mismo dinha; iyang itago ang butang gikan sa intelektuwal, intelektuwal nga mga mata, nga ilang hunahunaon, "Miyembro man ako sa iglesia, nalista man ang akong ngalan diha sa libro. Gibuhat ko man *kini*. *Ingon-ani* kaniadto ang akong amahan, ug uban pa." Medyo maayo man kana; nga, kini, wala'y ikasulti batok niini. Apan sa gihapon, higala, nag-ingon si Jesus, "Gawas kung ang tawo magpakatawo pag-usab, dili man lang niya makita," ang *makita*, dinha, dili buot ipasabot nga siya nakakita pinaagi sa iyang mga mata, kondili ang, "*masabtan* ang Gingharian sa Langit." Hangtud nga ikaw gipakatawo dinha!

⁹² Unsaon man sa niining ebanghelistang Baptist, unsaon man nianang tawhana nga mitindog didto ug manaway ug magbiaybiay Niini? Kita n'yo, wala'y bisan unsa man diha kaniya nga makadawat man lang Niini; apan gikinahanglan nga buhaton kini sa Dios, kita n'yo. Gihatag sa Dios kaniya ang Espiritu Santo. Gipakita Niya nga dili kini pakaaron-ingnon lamang, kini mao ang Pulong. Iya lang kini mga nadungog gikan sa usa ka ideyang pang-tulunghaan, ug ilang ginapaninguhaan kuhaon ang tanan nga—nga mga panalangin sa Dios ug ipahamutang kini diha sa usa ka milabay nang panahon.

⁹³ Usa ka batan-on nga magwawaling Baptist, dinhi dili pa lang dugay, ang ania nagalingkod dinhi ning buntaga; ug miduol siya kanako, ug nag-ingon siya, "Igsoong Branham, aduna ka'y usa ka butang nga ginabuhat nga sayup."

Ingon ko, "Tabangi ko."

⁹⁴ Ug nag-ingon siya, "Ikaw, sa hunahuna ko matinud-anon ka ug usa ikaw ka maayong tawo, apan . . ."

Ingon ko, "Salamat, sir."

Miingon siya, "Apan adunay usa ka butang nga imong ginabuhat nga sayup."

Ingon ko, “Nanghinaut ako nga sa usa ra unta ka butang nga sayup ang makita sa Ginoo.”

⁹⁵ Ug nag-ingon siya, “Buena, adunay...Kini mao kung unsa ang ginabuhat mo nga sayup.” Miingon, “Gipaningkamutan mong imantala sa kalibutan ang usa ka ministryong apostolikanhon, ug,” ingon pa, “ang ministryong apostolikanhon mihunong na kaniadto dungan sa mga apostoles.”

⁹⁶ Ingon ko, “Ingon nga usa ka Baptist ngadto sa usa ka Baptist, gusto ko nga ipangutana kanimo ang usa ka pangutana.”

Miingon, “Unsa man?”

⁹⁷ Ingon ko, “Nagatoo ka ba nga dinihogan ang Pulong sa Dios, ang matag tipik niini?”

Miingon siya, “Aba, oo.”

⁹⁸ Ingon ko, “Unya, Siya nag-ingon, ‘Ayaw dugangi’g usa ka pulong, o kuhaan og Usa.’ Kay,” Ang ingon ko dayon, “Akong ipakita kanimo kon diin ang apostolikanhong Panalangin miabot ngadto sa mga tawo, pinaagi sa usa ka saad sa Dios, karon ipakita mo kanako ang maong saad sa Dios ug kon kanus-a kini mihawa sa mga tawo. Kita mo, kung dili nimo maipakita kana sa Pulong, nan—nan kalimti na lang ang mahitungod niini, kita mo,” Ingon ko, “tungod kay sa gihapon Kini nagapadayon pa.”

⁹⁹ Wala g’yud siya’y nasulti og bisan unsa man sulod sa pila ka minuto. Ug mao nga ingon ko, “Buena, kung ingon-ana, igsoon, gusto ko nga ipangutana kanimo kini. Gipaila ni Pedro ang maong apostolikanhong mensahe, niadtong Adlaw sa Pentecostes. Ug nasayod kitang tanan nga matuod kana, kay anaa kaniya ang mga yawi sa Gingharian, nga gihatag ni Jesus kaniya. Ug karon tan-awa kung unsa ang iyang giingon. Miingon siya, ‘Maghinulsol, ang matag-usa kaninyo, ug managpabautismo sa Ngalan ni Jesus Cristo alang sa pagpasaylo sa mga sala, ug inyong madawat ang gasa nga Espiritu Santo. Kay ang saad alang kaninyo, ug sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios.’ Unya kung aduna ma’y bahin niini diin Iyang gikuha, nan unsa na’y nahitabo sa mga gipamulong ni Pedro niadtong Adlaw sa Pentecostes?” Kita n’yo? Wala, wala kini mihunong!

Minahal nga himalatyong Cordero, ang Imong
hamiling Dugo
Dili gayud Kini mawad-an og Gahum,
Hangtud ang tanang tinubos nga Iglesia sa
Dios
Maluwas, aron dili na magpakasala pag-usab.

Kung ingon-ana sa usa ka mas halangdon, mas
 matam-is nga awit,
 Pagaawiton ko ang Imong Gahum sa pagluwas,
 Sa diha nga kining luoy'ng yungit,
 nagkanganga nga dila
 Mipahulay na dinha sa lubnganan.

¹⁰⁰ Dios tabangi ako sa pagtoo Niana ug huptan Kini, ug kitang tanan, ug mobarug pinaagi Niini, tungod kay mao Kini ang Ebanghelyo sa Kamatuoran! Oo, sir.

¹⁰¹ Ang usa ka maalam nga tawo kinahanglan dili maglantaw sa niining mga butanga. Ug hibaloon nga dili kini magpulos. Wala gayud sukad magpulos ang mga niini. Ang usa ka giorganisang relihiyon ug ang usa ka giorganisang kasinatian wala gayud magpulos diha sa Presensiya sa Dios. Kinahanglan nga nagaabot kini, nga wala'y sambog, gikan sa Dios. Wala gayud kini sukad gigamit sa Dios, wala gayu'y higayon diha sa nangaging mga panahon nga sukad migamit ang Dios og ingon niana nga sistema. Karon kamo, oh, manguha kamo'g mga miyembro ug mga butang nga sama niana. Apan ang ginapasabot ko mao ang mga tinuod gayud nga binhi sa Dios, ang Panalangin nga pareho niadtong miabot didto sa Adlaw sa Pentecostes, wala gayud kini nagaabot pinaagi sa organisasyon; nagaabot kini pinaagi sa usa ka pagkahimugso, ingon nga gipakatawo na pag-usab.

¹⁰² Gidapit kita nga lantawon ang Israel ingon nga—ngon nga usa ka panig-ingnan, nga sila'y dugay nang ingon-ana. Himatikdi, “Ila Siyang gisalikway, ang gikataganang tuboran kanila, ug nanaghimo og ilang kaugalingong mga atabay.” Mahunahuna ba ninyo ang usa—usa—usa—usa ka butang, sa diha nga ang usa ka tawo anaa na diha sa usa ka tuboran, nagainom, ug unya gusto pang mohimo og iyahang atabay, kita n'yo, aron moinom gikan niini? Karon mao kana ang giingon sa propeta, mao kana ang giingon sa Pulong sa Dios. Mao kana ang gisulti sa Dios ngadto sa propeta. “Inyo Akong gisalikway ug—ug gibiyaan Ako, ang tuboran sa buhing mga tubig; ug nanagbuhat sa inyong kaugalingong mga atabay, nga mga likian, ug nagaagas ang mga niini.”

¹⁰³ Kita n'yo, usa ka butang, gusto nila og usa ka butang nga mahimo nilang kontrolon, o nga maipakita kung unsa ang ilang nabuhat. Ingon niana ang—ang kabuang sa inorganisa nga relihiyon. Kanunay kining nagapaninguha, kinahanglan aduna sila og butang niini nga sa kaugalingon nila mismo. Kinahanglan aduna sila og tanan niining mga sistema ug mga kapunongan, ug ingon nianang mga butanga, “Ug miyembro ako *niini* karon.” Imbis nga mapainubsanon lamang nga mga anak sa Dios, gusto nila og usa ka butang nga ilang maipakita sa ilang kaugalingon. Imbis tugotan ang Dios nga buhaton kini sa diha Iyang pamaagi, gusto nilang buhaton kini sa ilang pamaagi. Ug sa ingon niana nadala sa mga sistema ang iglesia sa karon.

Dili . . .Kada sistema, ang usa gusto kini sa *niining* pamaagi, ang usa usab gusto sa *nianang* pamaagi. Kung ikaw usa ka Methodist, kinahanglan mo nga kini sa *niining* pamaagi gayud. Sa Baptist, sa *niining* pamaagi. Sa Presbyterian, Katoliko, sa kung unsa pa man, aduna sila og ilang mga sistema. Wala’y unsa man batok niana, apun dili bahin niana ang akong ginahisgotan.

¹⁰⁴ Gusto sa tawo ang iyahang pamaagi sa pagbuhat niini, ug aduna ang Dios og Iyahang pamaagi sa pagbuhat niini. Ug nag-ingon Siya, “Nanaghupot kamo sa inyohang mga pamaagi, usa ka likiang atabay; ug dili modawat sa Akong pamaagi, ang dalan sa Kinabuhi.”

¹⁰⁵ Ug ingon niana kini sa gihapon sa karon. Wala kini nausab bisan gamay. Hunahunaa kung unsa ka buangbuang ang usa ka tawo nga ginabiyaan ang maong tuboran nga atabay sa dalisay og hinlo nga tubig nga nagaagas, ug unya gusto siyang moadto sa usa ka atabay nga likian nga siya ang naghimo mismo, ug nagkalut alang kaniya og usa ka atabay, nga kadtong basura nga atua sa atop sa kamalig nagadagayday paingon niini, dayon moinom gikan dinha. Sigurado gayud nga adunay pagkadaut sa pangisip nianang tawhana.

¹⁰⁶ Ug sa diha nga manghawid ang usa ka tawo ngadto sa usa—usa ka pang-simbahan nga panlantaw sa Kasulatan, imbis nga dawaton ang Espiritu Santo nga mao’y nagapanghimatuod sa Kasulatan ug nagahimo Niini nga realidad nganha kanimo, aduna gayu’y sa kung unsa nga espirituhanong kadaut nianang tawhana. Husto gayud kana. Sigurado, ang Espiritu Santo lamang! Aduna ang kada usa og interpretasyon sa ilang Biblia, sa kung unsa ang sa hunahuna mo nga husto. Wala ang Dios nagkinahanglan sa imong tabang. Wala ang Dios nanginahanglan sa imong interpretasyon.

¹⁰⁷ Ang Dios mismo ang Kaugalingon Niyang maghuhubad. Ginahimo sa Dios ang paghubad sa paagi nga Iyang—sa paagi nga gisulti Niya nga pagabuhaton Niya kini. Ang Ginoo nagsulti sa sinugdanan, “magkaaduna og kahayag,” ug nagkaaduna og kahayag. Wala kana nagkinahanglan og unsa man nga paghubad. Mao kadto ang gihimo sa Dios. Nag-ingon Siya “usa ka ulay ang manamkon,” nanamkon siya. Wala kana nagkinahanglan og unsa man nga paghubad. Nag-ingon Siya nga Iyang “igabubo ang Iyang Espiritu sa tanang unod,” gibuhad Niya. Wala kini nagkinahanglan og unsa man nga paghubad. Ginahubad sa Dios ang Kaugalingon Niyang Pulong pinaagi sa pagpanghimatuod Niini, ug sa pagpadayag Niini, ug sa pagpamatuod Niini.

¹⁰⁸ Ingon niana kung unsa ang propeta ginapamatud-an nga iya sa Dios. Miingon Siya, “Kung adunay usa sa taliwala kaninyo, kinsa usa ka espirituhanon o usa ka propeta, Ako nga Ginoo magapaila sa Akong Kaugalingon dinha kaniya diha sa mga

panan-awon, makigsulti kaniya pinaagi sa mga damgo. Ug kung unsa man ang iyang ginasulti nagakahitabo, kung ingon-ana kahadloki siya; apan kung wala kini nagakahitabo, ayaw siya kahadloki.”

¹⁰⁹ Ingon niana kini sa gihapon pag-isulti sa Dios ang Iyang Pulong, ug ang maong tawo moingon, “Ang Pulong mao *Kini*,” ug nagakahitabo kini sa ingon nianang paagi, kung ingon-ana ang Dios kini nga nagabuhat niini.

¹¹⁰ Apan kung siya nagaingon, “*Ingon-ani* kini, ug ang maong mga adlaw nangagi na,” aba gikuha na niini ang tanan nga . . . Nagakawhat siya og tinapay para sa mga gutom, sa iyang kamot, nga alang sa mga bata, ug kuhaon niya kini gikan kanila; ug nagakagutoman sila. Nganong gustohon man nimong moingon gikan sa usa ka atabay nga ania man kining tuboran nga atabay?

¹¹¹ Unsa man ang tuboran sa Kinabuhi karon? Unsa man ang tuboran sa Kinabuhi, tuboran sa buhing mga Tubig? Usa ka tuboran nga atabay, atong mahi-susama *Kini*.

¹¹² Karon gusto ko nga inyong mamatikdan ang kalainan sa usa ka atabay ug sa usa ka tuboran sa buhing tubig; ang tuboran nga atabay, ug ang karaang atabay nga likian didto puno sa mga insekto, mga tabili, mga baki, mga kagaw, unsa pang uban, kita n’yo.

¹¹³ Ug ania ang tuboran nga atabay. Karon bantayi kini. Kini adunay kinaugalingon nga pagsuporta. Dili na nimo kinahanglan magkuha og unsa man nga dagkung mga sistema ug maghakot og daghan nga kuwarta ngadto niini. Dili na nimo kinahanglan magpanghaylo og daghang mga miyembro. Ginasuportahan niini ang mga miyembro niini, sa Espiritu sa Kinabuhi nga anaa diha kanila, nga nagapamuhat.

¹¹⁴ Himatikdi ang tubig nga nagagikan niini, bag-o, lunsay ug hinlo. Dili nga usa ka atabay, butang nga mabaho nga kaniadto nahipatik sa kap-atan, kalim-an ka nagkalainlain nga mga hunahuna, nga nagaingon, “*Kini* ang husto, ug *kana* ang husto, ug *kini* ang pagsabot niini,” ug magpili ug magpahamutang, ug sa pagbuhat nila, ug pagkahuman maghimo’g usa ka denominasyon gikan niini. *Kini* lunsay ug hinlo, wala’y sambog nga Pulong sa Dios, nagagikan sa kamot sa Dios. *Kini* usa ka matuod nga tuboran nga atabay.

¹¹⁵ Himatikdi, ang sekreto sa gahum niini anaa sa sulod mismo niini. Dili kini makita sa mga tawo. Daw sa usa ka matang sa puwersa, sa ilalum niini, nga ginatukmod kini pahitaas.

¹¹⁶ Mahinumduman ko sa dihang ako, kaniadto, ang tigbantay sa mga pagpangayam didto sa estado sa Indiana. Nagaagi ako kaniadto, didto sa Harrison County, nga may usa ka atabay, usa ka tuboran. Kanunay kadtong nagabugwak-bugwak. Ug mora’g, oh, daw sa butang *kini* nga pagkamalipayon kaayo. Bisan pa anaa na sa yuta ang niyebe, ang yelo, nagyelo na,

kung daw sa unsa ka tugnaw, nagabugwak-bugwak kadto sa gihapon; kon diin ang karaang hinimo'g tawo nga lim-aw ug mga pundohanan, nga may mga baki ug tanan na, didto nagyelo na, ninggahi.

¹¹⁷ Ug nagapakita lang kana nga ang bisan unsang denominasyon, diha sa usa ka diyutay'ng kakulang sa Espiritu o usa ka gamay nga pagka-usab sa temperatura, manggahi na sa katugnaw. Apan ang tuboran sa Dios, Siya ang—Siya ang mao sa gihapon ang kagahapon, karon, ug hangtud sa kahangturan. Ginapapadayon niini ang tanang mga butang nga nagabugwak gikan niini ug ginapagawas gikan niini. Ug wala'y unsa man nga makasulod dinha, sa sugod pa lang. Dihadiha pagkasulod niini dinha, itukmod kini dayon pagawas niini.

¹¹⁸ Nagabugwak-bugwak kadtong butanga nga sama niana, ug ingon ko, milingkod ako didto usa ka adlaw, nahunahunaan ko, “siguro makig-estorya ako niana nga tuboran, sa makadiyut lang.” Gipuwas ko ang akong kalo, ug ingon ko, “Unsa man ang hinungdan nga pagkamalipayon ba nimo? Unsa man ang hinungdan nga nagabugwak-bugwak man ka? Tungod kini siguro nga nagainom gikan kanimo ang mga lagsaw, usahay.”

Kung makasulti pa siya, mahimong isulti niya, “Dili.”

Ingon ko, “Tingali tungod nga nagainom ako gikan kanimo.”

“Dili, dili kini ing-ana.”

¹¹⁹ Ingon ko, “Bueno, unsa man ang nagapalunsay kanimo, nga hinlo man kaayo? Mao nga unsa—unsa kining nagabugwak-bugwak, kanang nagapabugwak kanimo, nga puno ka sa kalipay sa tanang panahon, ug wala'y makapayelo kanimo? Nagabuhagay ka paitaas sa kahanginan, ug wala'y unsa man; hinlo kaayo nga tubig.”

¹²⁰ Kung makapakigsulti lang unta kini kanako, kahibalo na mo kung unsa tingali ang gisulti nianang tuboran? Mahimong gisulti na niya, “Igsoong Branham, dili kini ako ang nagabugwak-bugwak, usa kini ka butang nga anaa sa sulod nako, nga nagapabugwak kanako.” Ug ingon niana kini. Kabus kana nga pagkasulti, apan nahibalo na mo kung unsay akong pasabot.

¹²¹ Ug ingon niana kini sa usa ka natawo pag-usab nga kasinatian. Dili mo kini mapugngan. Usa—kini usa ka tuboran sa tubig sa sulod nimo, nga nagabugwak ngadto sa Kinabuhing wala'y katapusan. Kita n'yo, aduna gyu'y butang bahin niini, nga wala ka'y kahilambigitan niini. Ang mga pundohanan nga hinimo sa tawo mahimong magyelo, ug manghangyo sila alang sa mga rebaybal ug tanan na; apan ang tawo nga anaa sa ilalum niana nga Tuboran, nga nagakinabuhi diha nianang Tuboran, adlaw kini ug gabii! Dili, dili na nimo kinahanglan pa maghulat sa pang-lokal nga mga ulan ug pang-lokal nga mga rebaybal. Puno ikaw Niini. “Akong igahatag kaniya ang usa ka tuboran sa Kinabuhi, diha sa sulod kaniya, nga nagabugwak.” Aduna sa

kung unsa nga butang diha Niini, nga lab-as kada adlaw, nga lunsay ug hinlo. Ang wala'y-sambog nga Pulong kini sa Dios nga anaa sa imong kasingkasing ug baba, nga nagapanghimatuud sa Kaugalingon Niini, nagapamulong alang sa Kaugalingon Niini. Wala'y sapayan kanako kung nagaulan man, kung nagaulan man og yelo, unsa man nga matang kini sa panahon, malipayon ka sa gihapon tungod nga ang Espiritu Santo anaa sa sulod dinha nga nagabugwak-bugwak. Kini mao ang tinagong Gahum. Himatikdi. Oh, ang sekreto niini anaa sa kinasuloran niini.

¹²² Ginahatag niini ang kaugalingon mismo, nga libre, kang bisan kinsa nga gustong moinom ug mogamit sa sustansiya niini. Karon wala ka nagapamilya, moingon, “Bueno, karon kinahanglan moadto lang ako sa iglesiang Methodist tungod kay ako usa ka Methodist, para sa usa ka rebaybal. Kinahanglan moadto ako *dinhing* dapita, apan (kung) kinahanglan ko nga moadto ingon nga usa ka Pentecostal tungod kay usa ako ka Pentecostal nga rebaybalista.” Ginasultihan ko ikaw, pag-anaa na kanimo kanang nagabugwak nga tuboran sa Tubig, kana nga Tuboran, sa dihang nagainom ka na dinha, wala'y kalainan para kanimo, nagahatag ka ngadto sa bisan unsa nga nagahapít. Andam ka nga mohatag og usa ka paglaum sa Kinabuhi ngadto sa usa ka Katoliko, sa usa ka Protestante, sa usa ka Judio, sa usa ka wala-nagatoo sa Dios, o unsa pa kini. Ikaw sigurado, tinuod gayud nga aduna sa Kung Unsa Nga Butang diha kanimo, nga nagahimo niini.

¹²³ Inyong mamatikdan ang usa pa ka butang mahitungod niini, dili na ninyo kinahanglan nga pagabombahon kini. Dili na ninyo kinahanglan nga birahon kini, ug bombahon kini. Daghan na ko'y nakita niana hangtud nagpadaut kini sa akong ginabati, nga ginabomba ang kung unsa nga butang; nagatugtug sa pipila ka mga alawiton, ug maglukso-lukso, o—o dagkung mga binugkos sa mga literatura didto sa lungsod, ug dagkung mga karatula, “Ang tawo ning taknaa.”

¹²⁴ Adunay usa lamang ka Tawo ning taknaa, ug kana mao si Jesus Cristo, Nga mao sa gihapon kagahapon, karon, ug hangtud sa kahangturan. Adunay usa lamang ka Mensahero nga gikan sa Dios, ug kana—kana mao si Jesus Cristo. Oo, sir.

¹²⁵ Dili na nimo Kini kinahanglan pa nga bombahon pasaka, o birahon Kini paubos. O, dili na, dili na nimo kinahanglan nga idugtong Kini. Dawaton mo lang Kini, nga libre. Amen. “Ako mao ang Tuboran sa buhi nga Tubig; gibiyaan ninyo Ako, aron moadto ug magbuhat sa inyong kaugalingong mga pundohanang og tubig.” Karon dili na kinahanglan nimong bombahon Kini, nga bombahon Kini, nga birahon Kini, ug idugtong Kini, kaluton Kini, wala na'y bisan unsa pa man. Imo lamang dawaton Kini, nga libre.

¹²⁶ Dili na nimo kinahanglan pa ang bisan unsa nga teolohiyang hinimo sa tawo para sa usa ka trapong salaan, bisan pa man, aron masulti kaninyo kung unsa ang ginasala Niini, unsa ang nabuhat Niini. Wala. Usa ka hinimo sa tawo nga teolohiya sa kung unsa nga sistema pang-edukasyon, relihiyon nga nagapakamatarung sa kaugalingon *niini*, sa *niini*, o sa kung unsa nga atabay sa sistema pang-relihiyon; dili na nimo kinahanglan kini. Dili kini kinahanglan nga maanaa pa dinha. Pagbutangan mo og trapo ang ibabaw Niana, ibuga Niini kini diretso paitaas sa kawanangan. Wala kini og unsa man nga kahilambigitan Niini. Aduna kini og kinaugalingon nga pangsuporta! Ang Gahum sa Dios kini nga nagabugwak ngadto sa Kinabuhi. Ngano nga ang usa ka tawo biyaan man ang usa ka butang nga sama Niana, aron makighiusa ngadto sa usa ka sistema, sobra pa kay sa unsa ang mahimo ko nga isulti. Wala Kini nagkinahanglan og bisan unsa man nga mga trapong salaan. Wala Kini nagkinahanglan niini. Dili Niini kinahanglan nga mamahimong ingon niana, dili kini kinahanglan nga magsalig sa lokal nga mga ulan aron kini mapuno. Puno kini sa tanang panahon. Amen.

¹²⁷ Usa ka tawo, nadunggan ko nga nagaingon sila, “Masulob-on gayud ako karon.” Oh, uy!

¹²⁸ Oh, malipayon ako nga nagakinabuhi diha sa Presensiya sa Dios, bisan ang mga butang nagapadayon man diha sa maayo o sa dili maayo. Siya ang akong Kinabuhi. Amen. Siya ang atong Kinabuhi. Siya mao ang Kinabuhi, ang kadagaya sa Kinabuhi. Oo, sir. Ug—ug tan-awa kung unsa ang ginabuhat Niini alang kanato. Ang gahum ug ang kaputli Niini anaa sa sulod Mismo Niini. Wala kini nagakinahanglan og mga pagbomba gikan sa atabay o sa unsa man nga uban pa nga sistema.

¹²⁹ Adunay moingon, “Buena, unsa man ang imong fellowship card? Tan-awon nato kung usa ba gyud ikaw ka maayong Baptist. Tan-awon nako kung aduna ka’y kard. O—o, usa ba ikaw ka maayong Pentecostal, kung usa ba ikaw ka Oneness, Twoness, Threeness, o—o kung unsa pa man.” Kita n’yo, kini dili nagkinahanglan og unsa man nga pagbomba. Kanunay kini nga nagapadayon. Oo.

¹³⁰ Kahibalo mo, aduna ako kaniadto niining karaang atabay, kinahanglan ko nga katihon og tubig kini ug bombahon ug bombahon ug bombahon, pinaagi niining pangsuyop nga bombang karaan, aron mahipagawas kini didto; kahibalo mo, magbubo og dugang pa nga tubig niini, ug magbubo lang og pinundok nga mga insekto ug ingon nianang mga butang, aron magbomba pagawas niini og mga insekto ug ingon nianang mga butang. Sama lang gayud kana sa pamaagi sa uban niining mga sistematikong mga rebaybal.

¹³¹ Apan, salamat sa Dios, “Adunay usa ka Tuboran nga puno sa Dugo, diin ang mga makasala motuslob ilalum sa mao nga

agos!” Wala ka nagahimo og mga miyembro sa iglesia; nagahimo ka og mga Cristohanon gikan kanila sa diha nga nagaduol sila sa niana nga Tuboran.

¹³² Nganong biyaan man ninyo kana nga Tuboran sa buhing mga tubig, aron moinom sa usa ka awasanan nga sama niana?

¹³³ Wala na’y mga pagbomba; ang gahum Niini anaa sa sulod mismo niini. Wala na kini nagkinahanglan og mga pagbomba, oo, sir, kay (sa Kaugalingon Niini) ang Kaugalingon nga Kinabuhi Niini anaa Mismo sa sulod Niini. Ingon niana ang binhi sa Dios diha sa sulod sa kasingkasing sa usa ka tawo. Ang Kinabuhi sa Dios anaa sa sulod mismo sa usa ka tawo, dili sulod sa iglesia. Anaa kanimo, anaa kini sa sulod nimo, ikaw ang usa nga adunay binhi sa Kinabuhi diha sa sulod kanimo.

¹³⁴ Usa lamang ka tilaw Niini makapadani na sa tanang matang sa mga ministro. Pangutan-a ang paring Katoliko, pangutan-a ang Baptist, unsa pa man. Usa lang ka tilaw sa niining pagkalabas nga tubig sa tuboran, ginasulti ko kaninyo, makapaaghat kini nga Kini mao gayud ang Kamatuoran. Ang gigutom nimong kalag, bisan unsaon, makapaaghat ang maong tuboran sa mga giuhaw, bisan unsaon pa. Karon kung wala ikaw giuhaw... Kining luoy nga Baptist, wala siya giuhaw, sa sugod kaniadto; apan sa diha nga giuhaw na siya, natilawan ang tubig nga pagkalamian kaayo. Husto kana, apan kinahanglan nga uhawon ka, “ang bulahan nga pagkauhaw,” sama sa pagkatawag ni Jesus niana. “Bulahan ang mga gigutom ug giuhaw sa pagkamatarung, kay sila pagabusgon.” Ug giingon ni Jesus kana, higala. Oo, sir, usa Kini ka mabulahanon nga panalangin nga Tuboran alang ngadto sa mga gipang-uhaw.

¹³⁵ Nganong gustohon man ni bisan kinsa nga ibaylo Kini alang sa usa ka yanangan? Unsaon nimong magustuhan nga ibaylo ang usa ka tuboran alang ngadto sa usa ka tubig sa yanangan, nga puno sa mga insekto ug kontaminado sa tanan na nga matang sa mga teoriya nga hinimo sa tawo, nga nag-ingon ang Dios nga, “Ang nagadugang og usa ngadto sa Iyang Pulong, o nagataktak og usa gikan sa Iyang mga Pulong, pagatangtangan ang iyang bahin gikan sa Libro sa Kinabuhi”?

¹³⁶ Ug sa diha nga nagsaad ang Dios nga Iyang pagapanghimatud-an kining Pulong diha sa matag henerasyon, “Kay ang saad alang kaninyo ug sa inyong mga anak, ug kanila nga atua sa halayo, bisan ang kapid-an nga pagatawgon sa atong Ginoong Dios,” nganong mobomba ka pa sa kung unsa nga sistematikong bomba nga dugay nang kontaminado sa mga katuigan, gikan sa kung unsa nga karaan nang manna? Mahimong maayo kaniadto ang maong manna, wala ko’y batok niini, niadtong mga adlaw ni Martin Luther, sa niadtong mga adlaw *niini* ug sa mga adlaw *niana*, ug sa uban pa nga mga

repormista, wala'y unsa man mahitungod niini; apan kana mao ang mga manna nga nahulog kaniadtong dugay na nga panahon.

¹³⁷ Kung nahimatikdan nato sa Biblia, nga kinahanglan nila pangpuniton kini kada adlaw. Kinahanglan nilang manguha og bag-o. Human nga medyo magkadugay kini, nagakapan-os kini. Dili kini mapan-os kung dili kini madaut. Aduna na gyu'y mga kagaw sa sulod niini, o usa ka butang aron—aron mapan-os kini. Nahibalo kita nga ingon niana gayud kana.

¹³⁸ Ug mao usab ang mga sistema! Human nga napahaluna kini didto gikan sa usa ka dakung rebaybal ngadto sa laing usa pa, ug nahimong kontaminado kini ug napuno na og mga insekto, ug nga sama sa usa ka atabay napuno na sa mga waya-way, sama sa tawag namo kaniadto niini, mga magagmay'ng insekto nga manggimok didto.

¹³⁹ Ug ingon-ana kung unsa'y nahitabo sa kasinatian sa pipila niining mga katawhan karon. Sila—sila napuno sa mga waya-way, nga manggimok gikan sa usa paingon ngadto sa usa, ug ang usa ngadto sa uban pa, nga nagaestorya og mga estoryang wala man lang kini og Kamatuoran. Husto kana, manggimok gikan sa usa paingon ngadto sa usa pa. “Usa ako ka Methodist kaniadto; nagpamiyembro ako sa Baptist. Usa ako ka Katoliko kaniadto; Nahimo akong *ingon-ani*. Nahimo akong *ingon-ana*.” Pagka waya-way lamang kini. Oh, kalimti ang maong tibuk nga butang.

¹⁴⁰ Ug magduol ngadto sa Tuboran, amen, ang tuboran nga Atabay, ang kanunay'ng buhi nga Presensiya ni Cristo! Nagatoo ako Kaniya nga mao ang wala'y-pagkahurot nga Tuboran sa Kinabuhi. Sa sige mo nga pag-inom gikan Kaniya, nagakalabas pa kini og samot, ug mas nagakabugnaw pa gani kini, ug mas nagakalami pa gyud kini, ug mas nagakatam-is pa kini'g samot sa kalami. Ako Siyang naalagaran na karon sulod sa katloan-ug tulo ka mga tuig, ug sa gihapon matag adlaw samot pang mas nagakatam-is kini kaysa nangaging mga adlaw. Wala ako sukad. . . Miingon Siya nga dili na gayud kamo pagauhawon kung moinom kita niining Tubiga. Himatikdi kung unsa ka bililhon Kini. Oh!

¹⁴¹ Gibuhat sa Israel ang samang ginabuhat sa kadaghanan karon, gibiyaan nila ang buhi nga mga tubig, aron maghimo sa kaugalingon nila og ilang mga atabay.

¹⁴² Karon sa paghisgot mahitungod sa grasya sa makadiyut lamang, kung unsa ang grasya sa Dios. Nagkaaduna kita og mga balaod ug mga lagda, “Ug kung dili nimo maabot ang maong sukod niining sukaranan. . . Aduna ako'y usa ka pang-relihiyong sukdanan; kung dili nimo maabot ang sukod niana, kinahanglan nimo, dili ka makasulod,” ug uban pa. Apan ginaluwas kita sa Dios pinaagi sa grasya, dili pinaagi sa usa ka sukdanan. Kita n'yo? Apan ang Dios, paghisgotan na ang mahitungod sa grasya

karon, kung unsa gayud nga nahitabo kini, nga nagainom ka na gikan Kaniya. Gikan niining sukdanan . . .

¹⁴³ Nagabagulbul, ang bagulbulang Israel. Himatikdi, nag-ingon Siya, “Ug magaduaw Ako kaninyo pag-usab.” Himatikdi sa Kasulatan. Himatikdi, Iya silang pagasulayan, aron duawon sila pag-usab. Ang bagulbulan nga Israel, didto sa Dagat nga Mapula, giimbitahan kaniadto nga mosunod Kaniya latas didto sa malang-og nga tubig sa Egipto, aron nga mamahimong usa ka gawasnong katawhan. Mga ulipon sila kaniadto. Giimbitahan sila sa pag-adto didto aron nga mamahimong usa ka gawasnong katawhan, uban Kaniya. Manggawas palabang sa Patay nga Dagat, sa Dagat nga Patay; sa Dagat nga Mapula, diay, manggawas palabang niana, padulong ngadto sa kamingawan, aron ipahigayon ang usa ka pagpalain tali kanila ug sa mga manunundog nga nagapaninguhang sundogon kini, nga wala’y pag-circuncion.

¹⁴⁴ Oh, mao kana’y hinungdan sa kaguliyang. Kada usa kanila nangamatay didto mismo sa kam . . . o mismo—mismo didto sa dagat, si Faraon ug ang iyang mga kasundalohan. Nakakita sila og mga tawong nagalakaw diha sa supernatural nga Gahum, busa giadtoan nila didto ug naninguha nga sundogon kana, nga dili man apil sa mao nga panalangin. Ug sa diha nga gibuhat nila kadto, nangamatay sila. Usa kini ka karnal nga pag-awat-awat.

¹⁴⁵ Ang usa ka tawo nga nagapaninguha sa paghimo niana, nga nagapaninguha sa pagsundog-sundog sa usa ka butang, kung ingon-ana nagahimo siya og usa ka karnal nga pag-awat-awat sa usa ka tinuod nga Cristohanon.

¹⁴⁶ Ang igsoon ko nga Indian didto nahibalo niana. Mag-adto kamo sa Bombay ug inyong makita ang mga tawo didto, ang mga Hindu ug uban pa, gahigda sa mahait nga mga lansang ug ibabaw sa . . . nagalakaw diha sa buak nga mga botelya ug—ug nagalakaw diha sa mga nagbaga, aron ipasundayag kung unsa ang mahimo nilang buhaton, ug ingon nianang mga butanga sama sa . . . Nga karnal nga mga pagsundog-sundog sa kung kinsa nga tawo didto sa kalasangan, nga nagabuhat niana aron sa paghalad alang sa iyang diosdios.

¹⁴⁷ Atong makita kana sa taliwala sa tanan nga relihiyosong kinabuhi, karnal nga mga pagpanundog, usa ka tawong nagapaninguha nga mamahimong sama sa uban. Adunay usa lamang ka ehemplo nga imong sundon, kana mao ang mahisama kang Jesus Cristo, Kinsa mao ang Pulong. Ug unya sa diha nga ang Pulong sa Dios moabot kanimo, mamahimong ingon-ana usab kini.

¹⁴⁸ Apan gipangunahan sila mismo sa Dios padulong sa yutang saad, bisan pa man. Ilang nakaplagnan, usab, ang matag atabay, sa diha nga misugod na sila karon sa paglatas sa kamingawan

diha sa ilang panaw, human nga nagpalain sila, hingkaplagan nila nga ang matag atabay nangauga, alang kanila.

¹⁴⁹ Ug mahikaplagan mo ang mao ra nga butang, igsoon, pag mosugod ka na niining panaw padulong ngadto sa Yutang saad. Mahikaplagan mo nga sirado na ang mga pultahan. Sama sa giingon niadtong magwawali, nga usa ka Anglikano, o unsa man kaha siya, ug, ang unang butang kahibalo mo, gipalagpot siya sa iyang iglesia. Kita n'yo, samtang nga nahipadawat niya ang kadaghanan og Espiritu Santo, kana na ang katapusan niini.

¹⁵⁰ Ug atong...ug nahikaplagan sa Israel ang mao ra nga butang, ingon nga mga panag-ingnan, diha sa ilang panaw padulong sa yutang saad. Ang mga atabay nangauga na tanan. Oo, ang ilang panaw diha sa pagsunod sa Iyang gisaad nga Pulong, ang ilang panaw, diha sa mga atabay, hingkaplagan nilang uga. Karon hingkaplagan nila ang atabay—ang mga atabay nga dili mahimong saligan, alang sa maong panaw.

¹⁵¹ Ug kung ikaw magalakaw diha sa pagsunod sa Pulong sa Dios, ug maninguha nga mahiapil *niini* ug mahiapil *niana*, mahikaplagan mo nga wala'y usa ka atabay sa kalibutan nga magasuporta Niini. Wala gayud. Usa ikaw ka indibiduwal. Ginapangunahan ka sa Dios sa paagi gayud nga gusto Niyang pagapangunahan ka. Dayon, atong mahikaplagan ang mao ra nga butang sa karon, ug ang tanang mga atabay nangauga na.

¹⁵² Apan ang saad, matuod sa kanunay, ngadto sa Dios Nga magatuman sa Iyang saad ngadto sa Iyang katawhan. Nagsaad Siya nga sangkapan Niya ang tanan nilang mga kinahanglanon, mao nga gibuhat Niya kana. Sa taliwala sa wala'y sulod, nag-uga na nga mga atabay, hunahunaa n'yo lamang kini; ug sa nagabagulbol nga Israel, didto sa disyerto, diha sa ilang panaw! Iyang gitawag ang Iyang nangunang-alagad, ang propetang si Moises, ngadto sa usa ka dapit, ug giablihan ang usa ka tuboran sa buhi nga tubig, pinaagi sa usa ka Bato nga gibunalan, aron nga ang Iyang mga anak nga nagatoo dili mangamatay.

¹⁵³ Niining adlaw, nagahisgot kana mahitungod sa grasya, alang kanako. Dili kita mga takus. Sa paagi nga kita nagpamuhat, sa paagi nga kita nagkinabuhi, dili kita mga takus.

¹⁵⁴ Apan ang Dios, niining adlaw, sama dinhi mismo karong buntaga, tan-awa, ang sa Methodist, Baptist, Presbyterian, Katoliko, ug sa tanan, nag-abli Siya og usa ka Tuboran. Ginapamatud-an kini sa Mga Hebreohanon 13, nga Siya mao sa gihapon kagahapon, karon, ug hangtud sa kahangturan. Busa kini—ginapamatud-an niini ang, Juan 3:16, “Kay gihigugma sa Dios ang kalibutan, sa pagkaagi nga gihatag Niya ang Iyang bugtong Anak, aron nga ang tanan nga nagatoo Kaniya dili malaglag, kondili may Kinabuhi nga wala'y katapusan.”

¹⁵⁵ Ug gipataas kadto alang sa duha ka hinungdan, tungod kay ang mga katawhan kaniadto nagabagulbol ug nagapakasala, ug

silang gipamaak sa mga bitin ug silang mga naghimalatyon na; ug alang sa kapasayloan sa ilang mga sala, ug sa pag-ayo sa ilang mga sakit.

156 Ug kana ang mao ra sa gihapon nga Tuboran nga abli alang kanato karon, alang sa atong kaluwasan ug alang sa atong pagka-ayo, pisikal nga pagka-ayo. “Kay Siya mao sa gihapon kagahapon, karon, ug hangtud sa kahangturan.”

157 Ug sa diha ang maong Bato nga binunalan pinaagi sa gisaad nga Pulong sa Dios, gisugo, nagpabuhagay Kini og lunsay ng hinlo nga tubig; dili—dili nga malang-og, dili nga mahugaw, kondili ang Mismong Presensiya sa Dios. Lunsay nga tubig, ug nagluwas kini sa kadtong tanan nga ming-inom. Karon nahibalo kita nga matuod kana, tungod kay atong mabasa kini diha sa Daang Tugon, ingon nga usa ka tipo.

158 Karon, dili na kinahanglan nimong birahon kini, bombahon kini, idugtong kini, moadto pa sa seminaryo aron eskwelahan kini kung unsaon paggamit niini. Ilang isulti kaninyo didto kung unsaon paggamit kini, kita n’yo, “Oh, bueno, ikaw, kung imo nang nadawat ang Balaang Espiritu, nagtoo kami niana, busa nga imong—imong buhaton kini sa *niining* paagi.”

159 Apan, nakita n’yo, wala’y pagkontrol niini. Wala ka nagagamit sa Balaang Espiritu; ang Balaang Espiritu mao ang nagagamit kanimo, kita n’yo. Kita n’yo, dili ikaw, dili ikaw ang mogamit sa Balaang Espiritu; ang Balaang Espiritu ang may pagkontrolar kanimo. Ang gasa dili usa ka butang nga imong ginakuha, sama sa usa ka kutsilyo, ug pahaiton ang lapis gamit kini. Ang pagsurender kini sa imong kaugalingon ngadto sa Dios, ug ang pagpadaplin sa imong kaugalingon aron nga mahimo kang gamiton sa Balaang Espiritu.

160 Himatikdi, dili na gayud nila kinahanglan pa nga bombahon kini o birahon kini, o dili na nila kinahanglan pa nga ipangutana, “Karon unsaon man namo paggamit niining tubiga?” Tungod kay, nahibalo na sila kung unsaon paggamit niini. Sila ginauhaw. Nahibalo na sila kung unsa ang buhaton nila niini.

161 Ug mao man usab sa usa ka lalaki o babaye, kon unsa, wala’y igsapayan kon unsa man nga kredo o denominasyon siya nahisakop. Kung siya ginauhaw sa Dios, dili na niya kinahanglan modagan balik sa seminaryo, sama sa gihimo niining igsoong Anglikano, o igsoong taga-Britania, kagabii, nga kinahanglan pang mobalik ug makisayod kon unsaon, ngadto sa iglesiang Anglikano, kung unsaon niya gayud paggamit niining bililhong gasa nga anaa kaniya, ang pagsulti diha sa laing mga dila, ug kung unsaon niya gayud paghimo *niini*. Ila siyang sipaon pagawas, sa sugod pa lang. Kita n’yo? Giuhaw siya, busa gipuno gayud siya sa Dios. Ingon-ana lang gayud kini. Pagkauhaw kini, ug kung ingon-ana Siya lamang ang magapuno.

¹⁶² Dili na nimo kinahanglan nga magkaaduna pa og unsa man nga pagkontrol, nga adunay tawong mosulti kanimo kung unsaon paghimo niini. Ginapangunahan sa Dios ang matag usa diha sa—sa paagi nga gusto Niyang buhaton mo. Ikaw usa—usa ka indibiduwal, sa imong kaugalingon. Usa ka ka kabahin sa Dios. Wala’y si bisan kinsa man ang makakuha sa imong lugar. Ug wala’y paagi nga kinahanglan mo pang moadto sa kang kinsa man, ug mosulti karon, kinahanglan ko nga “himoon *kini* pinaagi niini,” o kinahanglan ko nga “himoon *kana* pinaagi niini.” Dili, sir. Ang Dios mogamit niini sa paagi nga—nga gusto Niya. Sa dihang ginauhaw ka, nahibalo ka na kung unsaon pag-inom.

¹⁶³ Ug kung ginauhaw ka karong buntaga, mag-inom gikan Niini, mao lang kana ang kinahanglan mong buhaton. May gitagana ang Dios og usa ka pamaagi alang sa ilang kauhaw, ang gipang-uhaw nga mga anak aron makaambit Kaniya Mismo nga libre. Ug nagtagana ang Dios og usa ka pamaagi alang sa matag lalaki ug babaye karong buntaga, kinsa gipanggutom ug gipang-uhaw. Tingali adunay mga tawong nagalingkod dinhi, nga wala pa naluwat. Adunay mga tawong nagalingkod dinhi nga anaa na sa unyaw sa kaluwasan.

¹⁶⁴ Adunay mga tawo dinhi, nagalingkod dinhi ingon nga mga miyembro sa iglesia, gusto ninyong mamuhat og maayo, apan nagainom kamo gikan sa usa ka atabay. Dili gayud nila isulti kaninyo kini nga mga Kamatuoran.

¹⁶⁵ Ang butang lamang, aron makaduol, mao ang pagdawat sa saad sa Dios ug dumuol niana nga Tuboran, dayon Iyang tagbawon ang mao nga kauhaw. “Siya nga nagainom gikan niini nga Tuboran dili na pagauhawon pag-usab.”

¹⁶⁶ Himatikdi karon kung giunsa—kung giunsa Niya pagpalingkawas ang Iyang—Iyang mga anak nga midawat niini nga tubig, pinaagi sa grasya, ug dili pinaagi sa usa ka sistema o sa usa ka atabay pang-edukasyon. Iyang ginapanghimatud-an ang Iyang Pulong, usa ka tuboran sa Kinabuhi. Pila ba kaninyo dinhi ang nahibalo nga nadawat ninyo ang Kinabuhi sa dihang gidawat ninyo kana nga Pulong ug ang Iyang tubig, nakahibalo gayud nga nadawat na ninyo ang Kinabuhi? [Ang kongregasyon nagaingon, “Amen.”—Ed.]

¹⁶⁷ Atong kuhaon, bueno, ingon nga pananglitan, usa pa gayud ka panig-ingnan, o duha, ug dayon magatapos na ako sa dili madugay. Ako—aduna gayud ako siguro nianang butones kon diin man. Apan himatikdi. Padayon lang ako nga nagasulti, apan dili nako tuyo nga himoon kini. Tan-awa, atong kuhaon ingon nga panig-ingnan, ang maong pipila ka mga tawo lamang.

¹⁶⁸ Atong kuhaon nga panig-ingnan ang maong babaye didto sa atabay ni Jacob, usa ka kinalut nga atabay. Nagalingkod siya didto. Mao lamang kadto ang nahibaloan sa babaye, kadtong

atabay nga iyang ginaadtoan aron magkalus og tubig. Ug sa pikas-atbang sa maong atabay nakita sa babaye, sa usa ka diyutay nga talan-awon didto, usa ka Lalaki nga nagalingkod didto, usa ka Judio. Ug Samaritanhon ang maong babaye, usa ka siyudad kadto sa Sicar. Ug hingbaloan nato nga kining Tawhana, kini nga Judio, nagsulti og talagsaong mga Pulong niining babaye, miingon, “Paimna Ako.”

¹⁶⁹ Ang babaye karon nag-ingon, “Aduna kita’y pagpanagkalahi. Dili kini—dili kini angay Kanimo nga mangutana kanako og sama niana; Ikaw ingon nga usa ka Judio, ug ako nga usa ka Samaritana.”

¹⁷⁰ Miingon Siya, “Apan kung nakaila ka lang kung Kinsa ang nagapakigsulti kanimo, mangayo ka Kanako og mainom, ug pagahatagan Ko ikaw sa mga tubig nga dili na nimo kinahanglan moadto pa niining atabay sa pag-inom niini; mahimong usa ka tuboran sa tubig nga nagabugwak-bugwak gikan kanimo.” Himatikdi, sa diha nga iyang hingkaplagan nga kini napamatud-an nga mao ang Kamatuoran!

¹⁷¹ Karon, una, bisan kinsa nga tawo mahimong makasulti niana. Apan miingon ang babaye, “Ikaw nagasulti nga magsimba sa Jerusalem, ug nagasimba kami dinhing bukira.”

¹⁷² Miingon Siya, “Ang kaluwasan nagagikan sa mga Judio. Nakahibalo kami kung unsa ang among ginatooan. Apan,” miingon, “tugoti Ko nga magsulti og usa ka butang kanimo,” diha sa mga pulong nga sama niini, “dili ra niining bukira, o sa Jerusalem. Taliabot na ang takna nga ang tawo magasimba sa Dios diha sa Espiritu ug sa Kamatuoran, kay mao kana ang ginapangita sa Amahan.” Miingon Siya, “Lumakaw ka kuhaa ang among bana ug mobalik ka dinhi.” Bantayi, dinhi niini kini napamatud-an. Dinhi ginapakita kung asa siya nga tuboran napaingon. Miingon, “Lumakaw ka ug kuhaa ang imong bana ug balik dinhi.”

Nag-ingon siya, “Wala ako’y bana.”

¹⁷³ Miingon Siya, “Ikaw nagsulti’g tinuod.” Kita n’yo, daw sa usa ka klaro kadto nga pagkasukwahi sa kung unsa ang gihangyo Niya kaniya, ug nga miingon, “Lumakaw ka kuhaa ang imong bana.”

Nag-ingon, “Wala ako’y bana.”

¹⁷⁴ Miingon, “Ikaw nagsulti’g tinuod.” Miingon, “Tungod kay ikaw nagkaaduna na’y lima, ug ang usa nga imong gikaipon karon dili man imong bana.”

¹⁷⁵ Himatikdi kana nga babaye, kung unsa siya kalahi sa mga saserdote niadtong adlawa! Ang mga saserdote niadtong adlawa nakitang nahitabo ang mao gihapon nga butang, ug nanag-ingon, “Usa kana ka yawa, usa ka pagbasa sa hunahuna, o—o

usa ka Beelzebub.” Kita n’yo, nangapakyas sila nga makita ang Pulong nga nagasaad og ingon niana.

¹⁷⁶ Apan kadtong gamay’ng babaye mas may nahibaloan sa Kasulatan kaysa ni bisan kinsa man nga saserdote. Miingon siya, “Sir, naila ko nga Ikaw usa ka propeta. Wala pa kami nagkaaduna og usa sulod sa upat na ka gatus ka tuig, sukad ni Malaquias. Apan,” miingon pa, “nangita kami og usa, ug nasayod kami nga adunay Usa nga umalabot, ang Mesias. Ug pagmoabot Siya, ingon niini ang Iyang mga pagabuhaton.”

Nag-ingon si Jesus, “Ako mao Siya.” Amen.

¹⁷⁷ Inyo bang namatikdan, gibiyaan sa babaye ang iyang timba didto sa atabay ni Jacob, midalagan paingon ngadto sa siyudad; nga napuno sa maong tuboran! Nakita niya kadto nga hingpit gayud nga gipamatud-an, ug Siya mao kanang Tuboran sa Kinabuhi. Tugoti ko nga ipaila-ila ang maong babaye kaninyo. Gibiyaan niya kadto; sa dihang Siya napamatud-an nga mao ang Pulong sa Kinabuhi. Gibiyaan niya kini; ug nadiskubrehan nga ang mao ra nga Bato, nga gibunalan didto sa kamingawan, napamatud-an nga atua mismo niadtong tungora.

¹⁷⁸ Tugoting ingnon ko, nga kadtong mao ra nga Dios sa mga nangaging panahon, nga pirmi natong ginahisgotan, ania Siya karon dinhi; dili pinaagi sa kung unsa mga panabot pang-teolohiya, kondili pinaagi sa personal nga pagkahibalo mahitungod sa Iyang mga pagpamatuod nga Iyang igabubo sa katapusang mga adlaw, ang Balaang Espiritu Santo diha sa Iyang iglesia. Dili Siya ang “Ako ang kaniadto.” Siya sa gihapon ang “AKO MAO,” pang-karon nga panahon, sa kanunay.

¹⁷⁹ Unya ang atabay nawad-an na kini og iyahang kalami. Ug mao usab sa matag tawo nga nahulog na sa gahum sa Dios, pinaagi sa bautismo sa Espiritu Santo, ang denominasyon nga sistema nawad-an na kini og kalami. Dili na nimo gusto ang nangabaho nga mga baki, ug mga tabili, ug mga insekto, ug uban pa. Nagainom ka na gikan sa usa ka Tuboran nga lab-as ug lunsay, ang Pulong sa Dios, nga lab-as matag oras diha sa imong kalag. Sama gihapon karon, sa dihang ang Pulong napamatud-an nga mao ang Kamatuoran, tilawi ug tan-awa kung dili ba kini husto.

¹⁸⁰ Bisan tuod nagserbisyo ang atabay og maayo, nagserbisyo og maayo sa iyahang panahon; apan, nakita n’yo, atua na ang Tuboran sa Kinabuhi, dili na ang atabay ni Jacob, alang sa espirituhanong pag-inom. Kung unsa man ang sa ilang hunahuna, kung moinom man sila gikan nianang atabaya, aba, okay lang kini; apan karon ang Tuboran sa Kinabuhi Mismo atua na didto.

¹⁸¹ Dili na nato kinahanglan karon ang mga sistema ug mga organisasyon nga anaa kita kaniadto. Ania na kita sa katapusang panahon. Ug nagsaad ang Dios, sa niining

katapusang panahon, sa mga butang nga Iyang pagabuhaton. Ug nakita nato kini nga nangatuman, sa Pulong. Atong nadungog ang tawo diha sa puwersang militar, nga mitindog, ug nagapangurog, ug nagaingon, sila, “May sa kung unsa nga butang nga andam nang mahitabo.” Mabati nato ang Balaang Espiritu nga nagapasidaan kanato nga adunay usa ka butang nga andam nang mahitabo. Makita nato ang tanang butang nga nahan-ay na. Kung ingon-ana, biyae kana nga sistema ug pagduol sa Tuboran. Oo, sir.

¹⁸² Nagserbisyo kini sa iyang katuyoan, apan atubang na karon sa maong babaye ang Tuboran Mismo.

¹⁸³ Diha sa Juan 7:37-38, nag-ingon si Jesus niadtong katapusan na nga mga adlaw sa fiesta sa tabernakulo (unsa ang Iyang giingon?), “Kung adunay tawong giuhaw, umari siya Kanako, ug uminom.” Didto mismo sa nagtapok nga mga teologo! “Kung adunay tawong giuhaw, umari siya Kanako, ug uminom. Kay nag-ingon ang mga Kasulatan, gikan sa kinasuluran Niya modagayday ang mga sapa sa Tubig nga buhi.”

¹⁸⁴ Kana ang buhing Tuboran. Mao kana ang Tuboran nga gisalikway sa mga tawo karon. Tungod sa kredo, ilang gisalikway ang Tuboran sa Tubig nga buhi. Tugoti ko nga ipaila ikaw ngadto Kaniya. Siya, alang kanako. . . Ug taposon na nako.

¹⁸⁵ Siya, kanako, mao kadtong Tuboran nga nagluwas sa kinabuhi ni Hagar, ug sa bata, sa diha nga hapit na sila mamatay didto sa kamingawan.

¹⁸⁶ Nagatoo ako nga Siya mao kadtong Bato, diha sa Isaias 32, Siya kadtong Bato nga atua didto sa yuta sa kahago. Siya mao ang dalangpanan sa panahon sa unus.

¹⁸⁷ Zacarias 13, Siya mao ang Tuboran nga pagaablihan alang sa Balay ni David, alang sa sala. Nagatoo ako nga Siya kadto. Dili ba? [Ang kongregasyon nagaingon, “Amen.”—Ed.]

¹⁸⁸ Diha sa mga Salmo 36:9, Siya ang tuboran sa Kinabuhi ni David. Siya ang mga Tubig nga malinaw pahulayan ni David, ug ang mga sibsibanan nga malunhaw. Siya mao ang Tubig sa kasapaan, para kang David.

¹⁸⁹ Diha sa Genesis 17, Siya mao ang dughan nga nagapasuso kang Abraham, si El Shaddai. Apan sa dihang ang iyang kinabuhi wala kaniya, siya sa gihapon. . . giingon sa Dios.

¹⁹⁰ “Usa ka tawong usa na ka gatus ang panuigon, unsaon man sa pagkahitabo kining butanga? Tigulang na ako, tigulang na ang akong asawa, unsaon pa sa pagkahitabo kining mga butanga?”

¹⁹¹ Nag-ingon Siya, “Ako si El Shaddai.” Karon, *El* mao’y “ang,” ug—ug ang *Shaddai* “dughan”, ug Shaddai pang-dinaghan, nga nagakahulogan og “Ako ang adunay dughan nga Dios.”

192 Sama sa usa ka bata nga naghigwaos ug may sakit kini, ug nawad-an na kini og kusog, mosandig sa dughan sa inahan ug mosuso aron mahibalik ang kusog niini. Sigurado. Dili lamang. . . Pag nakasuso na kini, dili na kini mag-alingasa. Diha sa dughan sa inahan, natagbaw na kini samtang nagakuha kini og kusog.

193 Ug ang si bisan kinsa man nga tawo nga saligan ang saad sa Dios diha sa iyang kasingkasing, nga, “Ang saad alang kaninyo, ug sa inyong mga anak, kanila nga atua sa halayo, bisan ang kapid-an nga pagatawgon sa atong Ginoong Dios,” ug magsandig ka mismo dinha niana ug magsuso pabalik sa imong kusog. Nag-alingasa nga bata, toohi kini! Para kini sa mga magtotoo.

194 Sa magtotoo nga manunulat, makahunahuna ako og daghang mga alawiton nga gihimo sa mga manunulat para kanato. Dihay usa kanila nga nag-ingon usa ka higayon niadto, Siya’y. . .

May Tuboran nga puno sa Dugo,
Gikan sa mga kaugatan ni Immanuel,
Pagtuslob sa makasasala sa nianang baha,
Matangtang tanan nilang mga lama sa sala.
Kadtong himalatyong kawatan nagkalipay nga
makita
Kadtong Tuboran sa iyang adlaw;
Diha hinaut ako, bisan nga dautan kaayo sama
kaniya,
Mahugasan ang tanan ko nga mga sala.
Ug sukad kaniadto pinaagi sa pagtoo nakita ko
kanang sapa
Ang nagaagay Mong mga samad ang gigikanan
niini,
Ang gugmang nagatubos mao na’y akong tema,
Ug hangtud na nga ako mamatay.

195 Alang kanako, Siya mao ang mga Tubig sa Pulong sa Pagpabulag, nga nagapahimulag kanimo gikan sa tanang butang nga supak sa Iyang Pulong. Kana ang Tuboran nga akong gitooan nga mao Siya. Oo, sir. Kana, Kini mao ang mga Tubig nga naghimulag kanako gikan sa hinimo sa tawo nga mga atabay, ngadto sa Tuboran sa Tubig nga buhi. Oh, higala, ako mahimo lamang. . . Mahimo mong ipadayon ug ipadayon, sa mga butang nga—nga kung unsa Siya kanato! Siya mao ang Alfa, Omega. Siya ang Sinugdanan, Siya ang Katapusan. Siya nga mao Siya kaniadto, karon, ug ang umalabot. Siya mao ang Gamut ug ang Kaliwat ni David. Siya mao ang Bitoon sa Kabuntagon. Siya mao ang akong tanan-tanan.

196 Ug, igsoong lalaki, igsoong babaye, kung wala ka pa nagkaaduna og usa—usa ka. . . Dugay ka nang nagainom gikan

niining diyutay'ng pundohanan sa tubig nga hinimo sa tawo, sa tibuok mong kinabuhi, nganong dili mo karong buntaga biyaan kanang pundohanan ug magduol ngadto niining Tuboran?

¹⁹⁷ Iduko nato ang atong mga ulo sa makadiyut lamang. Uban sa inyong mga ulo nga nakaduko. . . [Usa ka igsoong babaye ang nagasugod sa pag-awit diha sa laing mga dila. Blangko nga bahin sa teyp. Adunay usa nga nagahatag og paghubad—Ed.] . . . sa akong opinyon, ang pagtawag na sa altar. Pila man kaninyo karon?

¹⁹⁸ Ako—ako gikulbaan sa kinatibuk-an niini, ako—ako kamong gipapabilin og dugay kaayo, nakapahimo kanako nga pikas-pikason ang akong mensahe. Apan nagatoo ako nga gusto sa Espiritu Santo nga masabtan ninyo kung unsa ang akong ipasabot. Tan-awa, wala na'y mas mahinungdanon niining adlaw kaysa ang mahimong husto diha sa Dios; kita n'yo, ang atong mga pagpaniudto, unsa man kini, unsa pa man. Ania karon dinhi ang Ginoo. Karon, ako lamang hingdunggan kana sa makausa sa akong kinabuhi, sukad niining taknaa.

¹⁹⁹ Karon unsaon. . . kamong tanan dinhi, dili nga “unsa ka daghan.” Kamong tanan dinhi nga gustong moinom gikan Niana, motindog lamang sa pipila ka gutlo, alang lamang sa pag-ampo. Ang Dios magapanalangin kanimo. Ang Ginoo magapanalangin kanimo.

²⁰⁰ Karon pila ba kaninyo dinhi, nga—nga ania dinhi karon nagatindog, ang moingon, pinaagi sa pagpataas sa kamot sama *niini*, “Dios, maglihok Ka kanako, pun-a gayud ako, paimna ako gikan niini nga Tuboran. Ug wala nako nabuhat kung unsa ang husto, apan akong—gusto ko nga pasayloon Mo ako tungod niini. Gusto ko nga hugasan Mo ang akong mga sala. Ug tugoti—tugoti—tugoti ako, sugod niining adlaw, gayud. . .”? Tan-awa lamang! Uy!

There is a Fountain filled with Blood,
 Drawn from Immanuel's veins,
 And sinners plunged beneath the flood,
 Lose all their guilty stains.
 Lose all their guilty stains,
 Lose all their guilty stains;
 And sinners plunged beneath the flood,
 Lose all their guilty stains.

²⁰¹ Karon nga, ikaw nga usa ka Cristohanong magtotoo, imo nang gidawat si Cristo ingon nga imong kaugalingong Manluluwas, apan wala pa sa gihapon nimo. . . Karon kung ikaw wala pa, kana mao ang Tuboran. Ang usa lamang nga akong nahibaloan mao kanang Tuboran nga gikan sa mga kaugatan ni Immanuel. Karon, ug kung daghan kaninyo dinhi. . .

²⁰² Sama lamang kini sa akong ginasulti sa miaging gabii mahitungod niining gamay'ng agila nga nagalakaw-lakaw didto

sa kinoral kauban ang mga manok. Ug wala na'y iyang nahibaloan nga uban pa gawas sa mga manok, apan nahibalo siya nga adunay usa ka butang bahin kaniya nga lahi sa mga manok. Ug unya ang iyang inahang agila nangita kaniya, ug nagsinggit kini gikan sa itaas. Usa kadto ka pagtawag sa agila. Kita n'yo, kinahanglan usa siya ka agila, sa sugod pa lang, o wala gayud niya unta naila kadto nga pagtawag. Kita n'yo, siya . . .

²⁰³ Kinahanglan adunay usa ka butang dinha, nga may kinabuhi, o dili gayud kini makapamunga og Kinabuhi. Ug kung ang Binhi, ang Pulong sa Dios, anaa sulod kanimo, ania ang Balaang Espiritu karon aron buhion kana ug dalhon Kini ngadto sa pagka-realidad alang kanimo.

²⁰⁴ Pila man dinhi ang wala pa makadawat sa bautismo sa Espiritu Santo, mahimo bang ipataas ang inyong mga kamot? Sa tibuok palibot, sa tanang dapit, magmatinuuron lamang, kung wala pa nimo nadawat ang Espiritu Santo, ug nga gusto nimo, ipataas ang imong kamot. Bisan asa ka man, ipabilin lamang nga nakapataas ang imong kamot, sa makadiyut lamang.

²⁰⁵ Karon gusto ko, kamong nagatindog sa palibot ug nagalantaw kanila, gusto ko nga ipandong ang inyong mga kamot sa ibabaw nila.

²⁰⁶ Nagatoo ako mismo karon nga pagapun-on sa Balaang Espiritu ang matag usa kaninyo nga gusto Niini. Karon ayaw hunahuna ang mahitungod sa mga pagkaon dinha sa cafeteria. Atong hunahuna ang mahitungod sa Pagkaon dinhi. Kini ang Mao'y importante. Kinabuhi kini. Kita n'yo, Kinabuhi kini.

²⁰⁷ Karon paglingi diha sa inyong tuo, ang matag usa kaninyo, ug ipandong ang inyong mga kamot sa usa'g usa. "Ug gipandongan sila sa ilang mga kamot!" Karon gusto ko nga mag-ampo ka alang nianang tawhana nga gipandongan mo sa imong kamot . . .

²⁰⁸ Karon dili maghunahuna nga manggawas na. Dili maghunahuna og bisan unsa pa man. Hunahuna lamang, mismo karon, nga ania ang Balaang Espiritu aron pun-on ang matag usa. Abilihi ang inyong kasingkasing, ipangsalibay ang tanan nga tubig sa mao nga atabay, ug mag-ingon, "O Tuboran sa Kinabuhi, sumulod Ka kanako. Pun-a ako, O Ginoong Dios, sa Imong pagkamaayo ug kalooy."

²⁰⁹ Ginoong Jesus, kanang dili maugahan nga Tuboran! Nagaampo ako, Dios, nga Ikaw magapuno sa matag usa kanila. Hinaut nga ang Espiritu Santo mokanaug dinhi. Nagapangamuyo ako, Dios, nga mahikalimtan namo tanan ang mahitungod sa bisan unsa man nga butang; nga ang Balaang Espiritu mokanaug sa kinataliwad-an kanamo, karon mismo, ug maghatag kanamo nianang mga Tubig sa Kinabuhi, nga libre, gikan sa bisan asang dapit. Ihatag kini, O Dios. Samtang ang—ang nagapadayon nga pag-ampo ug pag-awit, dungan nga

nagakahiusa, Ginoo, sa paghibalo nga kana mao ang Imong Presensiya, ang Imong Balaang Presensiya, tinguha namong moduol ngadto sa Tuboran. Gusto namo ang matuod, tinuod nga bautismo sa Espiritu Santo. Ginoo, nagaampo kini nga mga tawo alang Niini. Nagapangamuyo ako nga, sa niining mismo nga takna karon, nga mapuno sila sa niining pagkamaayo sa Dios. Ihatag kini, O Dios. Dungga ang pangamuyo sa Imong mga anak. Hinaut nga mosulod Ka sa ilang pagkatawo, hinaut nga ang Gahum sa Dios, ug ang Espiritu Santo, pagapun-on sila. Ihatag kini, Dios.

²¹⁰ O daw sa unsa Ka namong ginapasalamatan alang niining kabag-ohan, alang sa Presensiya sa makagagahum nga Dios sa Langit, nga nagatindog sa taliwala kanamo! Sa mismo niining oras sa kaudtuhon, Ginoo, pakaona kami! Ginoo, gusto namo ang mga Kalan-on nga gikan sa Imong talad kan-anan. Pakaona kami, Ginoo, niining takna mismo. Pakaona kami sa Balaang Espiritu, diha sa among mga kinabuhi. Ang among gigutom ug nag-uga na nga mga kalag gipang-uhaw. Sama sa giingon Mo nga hubad sa awit, “Ibubo Niini ang Tubig sa nag-ugang yuta.” Tugoti kining mahitabo, Ginoo. Tugoti ang Imong mga Pulong nga mahipadayag diha sa mga kasingkasing sa Imong mga anak, “Mga tubig diha sa mga nagmala, nag-ugang yuta.” Eternal nga Dios, dungga ang pangaliya sa Imong mga alagad, ug ihatag kanamo kana nga Panalangin. Amen.

Oh, how I love Je- . . .

²¹¹ Magpadayon lang sa pagdayeg Kaniya karon. Hibaloa, ang Espiritu Santo ania dinhi. Kung dili nimo dawaton Kini, imo na kining sayup.

How I love Jesus,

“Gihigugma mo ba Ako nga mas labaw niini?”

. . . love Jesus,
Because He first loved me.

Oh, how I love Jesus . . . (Dalaygon ang Dios!)
Oh, how I love Jesus . . . (Unsa kaha kung
moabot na Siya ning . . . ? . . . -taknaa?)

Oh, how I love Jesus,
Because He first loved me.

I'll never forsake Him,
I'll never forsake Him,
I'll never forsake Him,
Because He first loved me.

Wonderful, wonderful, Jesus is to me,
The Counselor, Prince of Peace, Mighty God is
He;

Oh, saving me, keeping me from all sin and
shame,
Wonderful is my Redeemer, praise His . . .

212 Atong awiton kini para Kaniya karon!

Wonderful, wonderful, Jesus is to me,
Counselor, the Prince of Peace, Mighty God is
He;
Oh, saving me, keeping me from all sin and
shame,
Wonderful is my Redeemer, praise His Name!

213 Ang tanan nga nagbati niana, mag-ingon “amen.” [Ang kongregasyon nagaingon “Amen.”—Ed.] Oh, aleluya! Akong makita ang pipila ka mga tawo nga nagaduol na karon, uban ang Balaang Espiritu.

I once was lost, now I’m found, free from
condemnation,
Jesus gives liberty and a full salvation;
Saving me, keeping me from all sin and shame,
Wonderful is my Redeemer, praise . . .

Atong ipataas ang atong mga kamot karon ug tinuoray gayud nga magda- . . .

Oh, wonderful, wonderful, Jesus is to me,
A Counselor, the Prince of Peace, Mighty God
is He;
Oh, saving me, keeping me from all sin and
shame,
Wonderful is my Redeemer, praise His Name.

214 Imo ba Siyang gihigugma? [Ang kongregasyon nagaingon, “Amen!”—Ed.] Oh, pagkamaanindot! Dalaygon kanang Tuboran nga puno sa Dugo, diin ang mga makasasala nawala kanila ang tanang kahadlok sa tawo, ang tanan nga pagkahinukman, gawasnon na gayud diha Kaniya. Aleluya! Oh, uy, pagkamaanindot gayud niana!

215 Karon samtang atong awiton kana pag-usab, tugotan nato ang tanang mga Methodist, Baptist, Katoliko, Presbyterian, unsa pa, samtang awiton nato kini, “Wonderful, Jesus is to me,” molingi lamang kita sa palibot ug maglamanohay sa usa’g usa, magkaaduna gayud og usa ka maayong pagpakigsandurot. Kahibalo na kamo, ako, kana ang akong gusto. Sige, atong awiton kini karon sama sa atong pag-awit niini.

Oh, wonderful, wonderful, Jesus is to me,


216 [Si Igsoong Demos Shakarian nagapakigsulti kang Igsoong Branham, “Igsoong Branham, bag-ohay pa lamang ako nakadawat og balita bahin kang Presidente Johnson, gihatud siya sa hospital tungod sa atake sa kasingkasing, ug tingali angay kitang mag-ampo alang kaniya ug alang sa atong nasud.”

Ang mga kaigsoonan naghisgot-hisgot niini. Adunay usa nga nagaingon, “Maghulat sâ kita sa makadiyut lamang.”—Ed.]

Wonderful, Jesus is, (husto kana)
Oh, Counselor, Prince of Peace,

²¹⁷ [Si Igsoong Shakarian nagapakigsulti na usab kang Igsoong Branham, “Pasayloa ako, pasayloa ako pag-usab, gusto ba nimong monaug sa makadiyut lang?” Ginapangunahan na ni Igsoong Earl Prickett ang kongregasyon sa pag-awit og, *Wonderful*. Blangko nga bahin sa teyp. Ang kongregasyon nagaawit og *There’s A River of Life*. Usa na usab ka blangko nga bahin sa teyp—Ed.]

Ang Biblia nag-ingon, “Ipangamuyo kadtong mga anaa sa kagamhanan.”

²¹⁸ Langitnon namong Amahan, nagatindog kami karon diha sa usa ka desperadong panginahanglanon alang sa pangulo sa among nasud, ang among Presidente. Mahimong wala siya nahibalo niini, Ginoo, apan nasayod Ikaw niini. Ako nagapangamuyo alang kang Igsoong Johnson, ingon nga nagapamahayag siya nga usa siya ka magtotoo diha Kanimo. Ug, Amahan, usa ka atake sa kasingkasing, nasabtan namo, ang miigo kaniya. Nagaampo ako, Dios, luwasa ang iyang kinabuhi. Ania kami diha sa usa—usa ka nasudnong kapit-os mismo karon, bisan pa man. Ug tugoti nga ang Imong Espiritu moanha diha kaniya, Ginoo. Ug karon mismo, didto sa hospital o kung hain man siyang dapita, ug tugoti ang Imong Espiritu nga moanha nianang Walter Reed Hospital ug hikapon ang iyang lawas, sa pagluwas sa iyang kinabuhi. Ginoo, ang maong tawo anaa ilalum sa kabug-aton, mas labaw pa nga kabug-aton kay sa among nasabtan. Busa nagaampo kami, Dios, ingon nga mga magtotoo ug ingon nga kabahin niining nasura, nagapangamuyo kami alang sa among pangulo, nga Imong ihatag ang paglugway pa sa iyang kinabuhi, niining bililhong taknaa, sa Ngalan ni Jesus Cristo. Amen. 

MGA ATABAY NGA LIKIAN CEB65-0123

(Broken Cisterns)

Kining Mensahe ni Igsoong William Marrion Branham, una giwali sa Ingles niadtong Sabado sa buntag, Enero 23, 1965, para sa pamahaw sa Full Gospel Business Men's Fellowship International sa Ramada Inn sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2015 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org